

萬 有 文 庫

第一集一千種

王 雲 五 主 編

白 香 山 集

(六)

白 居 易 著

商 務 印 書 館 發 行



白香山集

(六)

白居易詩

國學基本叢書

白香山集

卷三十五

京兆尹盧士政除檢校左散騎常侍兼中丞瀛漠二州觀察等使制

勅夫疆理天下。壤制四方。乘時省置。何常之有。故方隅未寧。務先經略。則專委方伯以總統之。及兵革甫定。思弘風化。則並命連帥以分理之。朕常以幽薊一方。環封千里。延袤廣莫。專制實難。屬元改轅。新帥進律。因而制置。以叶便宜。蓋王者弛張變通之要也。京兆尹盧士政爲人端和。爲政寬簡。自尹京輦。人甚便安。今司徒總籍甚爾名。叶從人望。河間列郡。乞委士政。因而可之。必易爲理。況新造之府。經始之政。勞俸安輯。是爾所能。俾珥左貂。兼執中憲。寵任不細。勉哉是行。可依前件。

武寧軍軍將郭暈等五十八人加大夫賓客詹事太常卿殿中監制

勅某官某。頃以齊寇發狂。王師致討。武寧裨將五十八人。雖有元戎。指蹤制勝。實由衆校。同心許國。合力成功。宜以憲秩。儲寮寺卿。府監舉申賞典。用益勳庸。可依前件。

贈僕射蘇兆男三人妻兄一人並被蔡州誅戮各贈太子贊善大夫等制

初故某官男某等。淮寇之起。爾陷其中。能守父訓。不失臣節。竟遇讎虜。並爲鯨鯢。莫將死而心傾。劍雖埋而氣在。毒延禦侮。禍及維私。將賁幽魂。宜追寵命。俾贈青宮之秩。用申赤族之冤。可依前件。

王士則除右羽林大將軍制

勅羽林所設。上法星文。軍衛之中。號爲雄重。稱茲選任。不易其人。左驍衛將軍王士則。勳戚之家。義方之子。發身學劍。餘力知書。早踐班榮。累參環列。職近而身彌檢慎。任久而心益恭勤。卑以自居。勞而不伐。況一備禁衛。四爲偏將。滯於久次。宜有超升。俾領上軍。仍遷右廣。統良家之騎士。訓期門之材官。寵任不輕。無墮於事。可右羽林軍大將軍。

前穀熟縣令李季立授奉天丞兼監察御史充迴鶻使判官制

勅某官李季立。蕃國通聘。使臣告行。上請屬察。同役王命。以爾常爲令長。頗有幹能。加之恪恭。可備選擇。假威憲職。兼命邑丞。足示優榮。勉勤任使。可依前件。

李懷金等各授官制

勅博野鎮都虞候殿中監李懷金等。戮力戎行。叶謀王事。旣展扞城之効。彌彰奉國之心。不加寵榮。何勸忠勇。敬授爵命。勉思令圖。可依前件。

王日簡可朝散大夫德州刺史制

勅前代州刺史代北軍使王日簡。吾聞任有才則事集。獎有勞則功勸。以日簡嘗爲代守。軍睦人安。旌効所能。可居要地。是用超登階級。遷領郡符。勵精壹意。其聽吾言。夫主憂則臣勞。時危則節見。今寇戎暴起。封域未寧。是忠臣奮奇謀。烈天展殊効之日也。朝立功而夕受賞。汝其念之哉。可德州刺史。

薛元賞可華原縣令制

勅前大理丞薛元賞。甸服之制也。樹以尹正。承以令長。上下有統。而理化行焉。以元賞前爲廷尉丞。察獄

評刑。頗聞敬慎。寺卿奏課。邑宰缺員。故移欽恤之心。使布惠和之化。上承爾長。下字吾人。無或越思。而垂統理。可華原縣令。

王承林可安州刺史制

勅。安陸古鄖國矣。介荆漢之間。承軍旅之後。宜得謹良長吏以養理之也。前相州刺史王承林。比刺安陽。勤修其職。錄勞獎善。故申命焉。況爾生勳伐之家。早階寵祿。宜自修立。以光大其門。爾當思勤儉以檢身。務廉平以臨下。率吏用禮。勸人歸農。勿慎勿佻。一遵吾之約束。可安州刺史。

嚴綬可太子少傅制

勅。東朝保傅。歷代尊宗。漢擇名儒。任先疏廣。晉求耆德。選任山濤。實資六傅之賢。用弘三善之道。檢校司徒兼太子少保。嚴綬文雅成器。恭謙致用。出領重鎮。入爲具寮。以長卿士。歷踐中外。備嘗艱虞。殆三十年。勤亦至矣。況理心以體道。知命而安時。是謂教誨之人。可領調護之任。由保遷傅。爾其敬之。可太子少傅。

源寂可安王府長史制

勅。義成軍節度判官檢校兵部員外源寂。早膺慰薦。累展才能。謀畫有終。恭勤無怠。守臣推善。列狀升聞。可使束帶立朝廷。曳裾遊藩邸。俾從賓佐。入補王宮。

鄭枋可河中府河西主簿制

勅。鄭滑觀察推官試太子通事舍人鄭枋。名列士林。職參軍府。修身無闕。從事有勞。旣展効於卽戎。宜試

能而補吏。俾之糾邑。庶有可觀。可依前件。

喬弁可巴州刺史制

勅。權知巴州刺史喬弁。前假竹符。俾臨巴郡。一意爲理。三年有成。州人借留。廉使置奏。旣因會課。宜及陟明。九仞之功。無虧一簣。無忤真授。而怠初心。可巴州刺史。

薛戎贈左散騎常侍制

勅。夫有名於時。有勞於國。盡忠以事上。遺愛而及下。則必生享寵祿。歿加褒崇。所以旌善人而勸來者。故浙東觀察使越州都督兼御史中丞薛戎。挺英於冠族。擢秀於士林。凡踐官榮。皆著聲績。及授符節。委之察廉。自江而東。政成人久。老而將智。病且知終。方覲闕庭。而捐館舍。是用廢朝軫念。加賻申恩。俾增九原之光。追備八貂之列。可依前件。

辛弁文可淄州長山縣令制

勅。趙州臨城縣令辛弁。既有英材。又知臣節。遁道寇難。奔走道途。言念忠勞。宜加恩獎。俾換銅墨。移宰長山。可依前件。

知汴州院官侍御史盧濠。可檢校倉部員外郎陝府院官盧台。可兼侍御史鄭滑院官李克恭。可試大理評事。獨孤操。可衛佐。並依前知院事。同制。

勅。鹽鐵官漕運職。小大遠邇。羅布於四方。自丞相播兼領以來。而撮大綱。覆羣吏。職以能進。秩由課遷。法無僭差。人有懲勸。今台濠。克恭。操等。咸當是舉。分命以官。勉副已知。無忝成命。可依前件。

王智興可檢校右散騎常侍兼御史大夫充武寧軍節度副使領本道兵馬赴行營制

勅沂州刺史御史大夫王智興李愿李愬之鎮武寧地汝爲裨將勵節忘身濟成大功汝實有力獎其誠効擢授郡符海沂之間又着聲績宜加新命以寵舊勞仍提銳師往副戎律夫將之撫衆如子弟制衆之視將如父兄苟推赤心而無疑必蹈白刃而不悔勉親士卒佇翦寇戎可依前件

田羣可起復守左金吾衛將軍員外置兼澶州刺史制

勅前左武衛將軍田羣忠謹立身韜鈴嗣業自參戎衛尤見恭勤而燕蘇之間澶爲要郡公侯之後羣有令名俾分符竹之榮佇濟弓裘之美宜奪情禮起而用之

楊於陵亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶戶部尙書楊於陵亡祖母崔氏等風範有初光塵未昧發揮婦道標表母儀施及孝孫陟於高位夫蘊德者垂裕於後揚名者光昭其先俾彰積慶於中故許推恩而上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專城職當守土不承制命擅赴闕庭遠越詔條叛離官次將懲慢易宜舉憲章可連州司馬仍馳驛發遣

鄭公遠可陝府司馬制

勅朝議郎守原王府長史上柱國賜緋魚袋鄭公遠衆推士行時許吏才自列班榮尤彰恭恪夙夜匪懈

春秋已高。宜罷曳裾之勤。往贊坐棠之理。是爲優秩。用答令名。可守陝州大都督府右司馬。散官勳賜如故。

劉泰倫可起復謁者監制

勅朝議郎前行內侍省內謁者監上柱國賜紫金魚袋劉泰倫。古者有中涓。謁者皆侍奉親近之臣也。今之寵秩。亦由舊焉。況泰倫有行藝。可以飾身。才幹。可以掌務。監臨內署。朝請中闈。謹密端和。甚宜厥職。久於其事。無之實難。宜加進秩之恩。仍舉奪情之典。勉承獎任。勿替初終。可起復朝議大夫。行內侍省內謁者監。

王師閔可檢校水部員外郎徐泗濠等州觀察判官制

勅前徐泗濠等州觀察支使朝議郎殿中侍御史內供奉上騎都尉賜緋魚袋王師閔。朕以師律授智輿。智輿以軍書辟師閔。才旣爲知己。用官不俟滿歲遷。所以使能而責理也。然則贊廉察。安戎旅。旣命之後。吾有望於爾焉。勉副所從。佇展來効。可檢校尚書水部員外郎。兼殿中侍御史。充徐泗濠等州觀察判官。勳賜如故。

薛從可右清道率府倉曹制

勅三品子薛從。惟汝父平守吾藩鎮。能以忠力。殄寇安人。疇庸旣以啓封。延賞亦宜及嗣。勉承義訓。無忝寵章。可朝散郎。行右清道率府倉曹參軍。

義武軍行營兵馬使高從政等五人。河東節度行營兵馬使傅義等二十四人。並破賊。可御史大

夫中丞侍御史制

勅古者賞不逾時。所以勸勳庸也。爵有加等。所以激忠勇也。而某官高從政等。以義武之師。統晉陽之甲。前蹈白刃。中推赤心。大摧賊徒。連告戎捷。超榮速賞。爾實當之。故視軍功。遞遷憲秩。破竹之勢。其思有終。可依前件。

故奉天定難功臣試殿中監陳日榮等一十二人可贈商鄧唐隋等州刺史制

勅春秋崇褒善之義。國家厚追榮之寵。其身歿而名不殞。時去而恩末及者。大司馬得稽勳籍舉而行之。故某官某等凡十三人。按狀徵書。宜加寵命。飾終之典。其可廢乎。可依前件。

段斌宗惟明等除檢校大理太僕卿制

勅義武軍節度都押衙兼侍御史段斌。衙前虞候檢校太子賓客宗惟明等。寇虞未平。將校方用。宜以爵賞。勤其忠勞。而斌奔命獻俘。惟明奉章告捷。各勤乃事。咸造於庭。並加寵榮。以示優獎。斌可試太僕卿。依前兼侍御史。惟明可檢校大理卿。餘各如故。

戶部尚書楊於陵祖故奉先縣主簿楊冠俗可贈吏部郎中於陵奏請迴贈制

勅故某官楊冠俗。貽厥孫謀。垂裕後世。揚其祖美。不忘先也。以冠俗之棲遲下位。道屈於時。以於陵之光大其門。慶鍾於後。生不逮事。歿有追榮。宜加義率之心。用舉飾終之典。可贈吏部郎中。

故光祿卿致仕李恕贈右散騎常侍制

勅故某官某國之老子。藩臣之兄。嘗列棘以承家。竟懸車而捐館。生加爵寵。歿及褒榮。茲惟舊章。用慰幽

夢。

劉悟妻馮氏可封長樂郡夫人制

勅。古者有策名命婦。賜號夫人。蓋積善於閨門。而受封於國邑也。澤潞節度使劉悟妻馮氏。傳芳茂族。作合良臣。成此忠貞之功。因於輔佐之力。禮從夫貴。慶叶家肥。俾開大郡之封。以正小君之命。可封長樂郡夫人。

夏州軍將二人授侍御史制

勅。某官某等。早稱武藝。久隸軍麾。稟命元戎。服勤王事。或千里移鎮。從爲紀綱。或十乘啓行。倚爲肘腋。歷年月積。成勤勞。不加寵榮。何勸忠効。並命憲職。宜敬承之。並可兼侍御史。餘如故。

日試詩百首田夷吾曹璠等授魏州兗州縣尉制

勅。乃者魏兗二師。以田夷吾曹璠善屬文。貢置闕下。有司奏報。明試以詩。五言百篇。終日而畢。藻思甚敏。文理多通。賢侯薦延。宜有升獎。因其所貢郡縣。各命以官。而倚馬員外。衣錦歸去。以文得祿。亦足爲榮。可依前件。

衛佐崔蕃授樓煩監牧使判官校書郎李景讓授東畿防禦巡官制

勅。某官崔蕃等。咸因文行。自致班序。或佐衛蘭。或典校蓬山。各從所知。將展其用。夫司牧垌野。備禦都畿。所以班馬政而遏寇虞也。茲皆重務。爾勉贊之。可依前件。

李愬李愿薛平王潛馬摠孔戢崔能李翺李文悅咸賜爵一級并迴授男同制

勅封爵之設在乎賞勸。有以褒德。有以序勳。登善興功。實由茲道。而某官李愬等。或望崇台鼎。或委重旌旄。爰及藩條。共分憂寄。有勞於事。無怠於心。宜疏爵以啓封。許推恩而及嗣。祇受厥命。永孚於休。可依前件。

故工部尚書致仕杜羔贈右僕射制

勅。故某官杜羔。生於士族。發爲公器。敦厚孝友。本乎天性。文學政事。出於餘力。自立朝右。藹然素風。司諫平刑。駁議廉問。凡所踐歷。不懈於位。以年致政。以疾就第。出處進退。皆叶時中。遽此淪謝。惻惻興念。夫生有榮祿。歿有寵贈。所以極君道。厚時風。亦望人有始卒之義也。宜追端揆。以申褒飾。猶有精爽。知吾不忘。可贈尚書右僕射。

幽州兵馬使劉棟除左驍衛將軍制

勅。某官劉棟。夙負氣概。早習騎射。才推燕趙之士。學究孫吳之書。加以忠厚。可當任用。況有令弟。爲吾儕臣。節着艱貞。情鍾友愛。夫寵寄於外。莫重於藩垣。委任於中。莫親於禁衛。加此一職。寵示二人。豈不爲榮。季出叔處。可左驍衛將軍。

前幽州押衙瀛州刺史劉令璆除工部尚書致仕制

勅。某官劉令璆。勳伐之家。弓裘之嗣。嘗修戎職。亦領郡符。迨此遲暮。知有止足。夫壯而奮發。以忠事國。老而知退。以道安身。人所難能。理宜嘉尚。俾超崇秩。以寵高年。可工部尚書致仕。

盧衆等除御史評事制

勅幽州節度判官盧衆等。幽薊重鎮。盧龍舊軍。是吾北門。委任上將。實資寮佐。以濟謀猷。爾等或參務戎旃。或專司奏記。俱因事任。各展才能。而御史府官庭尉寺吏用申褒獎。以勸忠勤。勉奉元戎。佇成嘉績。

張偉等一百九十人除常侍中丞賓客詹事等制

勅盧龍軍押衙兵馬使什將隨軍某等。夫爵賞行於上。則忠勞勸於下。有國之典。其可廢乎。吾思薊師自將及吏。合聚衆力。鎮寧一方。縣以歲年。積成勤効。今以朝右貴秩。宮坊清班。舉爲寵章。用申酬獎。

梁瓚等六人除范陽管內州判司縣尉制

勅盧龍軍節度要藉梁瓚等。咸以幹能。早膺任使。各參軍要。同濟戎功。言念恭勤。宜加優獎。郡掾邑佐。分而命之。仍兼舊職。勉申來効。可依前件。

渤海王子加官制

勅渤海王子。舉國內屬。遣子來朝。祇命奉章。禮無違者。夫入修職貢。出錫爵秩。茲惟舊典。舉而行之。

石士儉授龍州刺史制

勅石士儉。東川帥涯上言。士儉久習武藝。兼通吏事。可使爲郡。責成其功。吾聞江油巴夷雜處。勿以遐陋而忘緝綏。奉法愛人。無負知己。可龍州刺史。

韓萇授尙輦奉御制

勅韓萇。局分六尙。職奉七輦。茲惟優秩。列在通班。以爾立身頗恭。守事甚謹。宜有所獎。可升於朝。可尙輦奉御。

孟存授成都府少尹制

勅孟存嘗參劇務亦牧疲人咸有能名得於主師三蜀征鎮屯於成都雖有忠賢委爲尹正至於贊修庶務通統諸曹承而貳之實資亞理勉勤厥職無累所知可成都府少尹

杜元穎等賜勳制

勅中書舍人杜元穎等有位於朝有勞於事不加慶賜何勸恪勤宜各策名列於勳籍可依前件

商州壽州將士等賜勳制

勅某官某等大勳者所以馭貴敝勞亢身庇族非因大慶不降殊恩爾皆委質從軍服勤事國宜按勳籍分而賜之可依前件

內侍楊志和等授朝散大夫制

勅楊志和等咸分要職列在內司慎靜檢身恭勤守事宜以章綬命爲大夫佩服寵光爾無失墜可依前件

內常侍趙弘亮加勳制

勅內常侍趙弘亮等列名禁籍祇命宮闈多歷歲時積成勞効宜加勳賞以洽恩榮可依前件

烏行初授衛佐制

勅烏行初重胤之子早稟義方詩禮弓裘式聞不墜賞延之典本勸忠勳環衛之官兼資慎擇非唯父任亦以才升可左衛曹參軍

烏重胤妻張氏封鄆國夫人制

勅古者夫爲大夫。則妻爲命婦。況在小君之位。未加大國之封。豈有唯廢徽章。抑亦無勸忠力也。某官某妻某氏。以鵠鳩之德。作合邦君。輔成勳猷。馴致爵位。雖從夫貴。未授國封。今以南陽本邦善地。錫爲湯沐。加號夫人。茲乃殊榮。足光閨闈。可封鄆國夫人。

卷三十六

鎮州軍將王怡判官李序先被賊中誅囚並死各贈官及優卹子孫制

勅。朕常思鎮冀之間。弔伐之際。有仗順死義。不吾聞者。因命弘正列狀以聞。而某官王怡等。頃陷艱虞。思伸忠効。或名節將立。併命於幽憂。或義烈臨奮。失身於戮辱。履危如虎尾。視死如鴻毛。若無褒揚。何勸天下。旣降飾終之命。仍知身後之禮。追榮延寵。有越常倫。冀使死節之魂。忠憤之骨。知我憐憫。歿無恨焉。怡可贈左僕射。序可贈給事中。

武寧軍陣亡大將軍李自明贈濠州刺史制

勅。王師之討蔡平鄆也。自明爲武寧裨將。隸於元戎。凡所指蹤。必先致命。三軍之士。於今稱之。有勞未圖。無祿早代。生不及賞。歿而加恩。庶使猛將義夫。聞而勸相曰。死猶不忘。況生者乎。可贈濠州刺史。

裴弘泰可太府少卿知左藏庫出納制

勅。前度文河北。權鹽使朝議郎檢校尚書刑部郎中使持節貝州諸軍事兼權知貝州刺史侍御史充本

州防禦使上柱國賜紫金魚袋裴弘泰。九土之貢，百品之貨，辯其名物，謹其出納。常在外府，統以上卿，宜求幹敏之才以爲之貳。而弘泰頃分權務，兼撫郡民。當軍興之時，法行政立，則受藏之府事繁物殷，量其器能，可以專委。勉膺是任，無替前勞。可守太府少卿，知左藏庫出納，散官勳賜如故。

李昌元可兼御史大夫制

勅通議大夫使持節儀州諸軍事儀州刺史兼御史中丞上柱國李昌元。弓裘令子，疆場勞臣。能讀父書，甚識戎事。每在戰陣，未嘗無功。及委蕃條，亦聞有政。而知臣者君也，賞勞者爵也。亞相之秩，威重寵崇。加乎爾身，以勸能者。可兼御史大夫，餘如故。

田穎可亳州刺史制

勅正議大夫前檢校右散騎常侍使持節洛州諸軍事兼洛州刺史御史大夫充本州團練使上柱國賜紫金魚袋田穎。自別屯將壘，專領郡城。而能勤恤師人，與之勞逸。故臨戎則士樂爲用，撫下而衆知嚮。方忠勳旣彰，能政亦着。牧守之選，吾所重之。謙鄩之間，人亦勞止。授爾印綬，往勞來之。宜推前心，佇立後効。可檢校左散騎常侍使持節亳州諸軍事兼亳州刺史御史大夫本州團練使鎮遏使散官勳賜如故。

薛伯高等亡母追贈郡夫人制

勅某夫人某氏等。始播婦儀，終垂母道。教其令子，爲我良臣。而皆茂著才名，榮居爵位。永言聖善，宜及顯揚。俾追啓邑之封，式表統家之訓。可依前件。

李佑授晉州刺史制

勅。牧守之官。與吾共理。下之安否。繫乎其人。必稽前功。方降是命。某官李佑。夙負材器。累經任用。當領軍郡。頗著政聲。而平陽舊都。近罷征鎮。土疆事物。既廣且殷。藉爾良能。爲予撫字。夫均其征役。簡其科禁。謹身省事。以臨其人。而人不安。未之是也。往弘是道。以康晉人。可依前件。

武寧軍將王昌涉等授官制

勅。王昌涉等。早以材力。召募從軍。元和已來。南征北伐。咸有勞績。著於一時。主帥上聞。乞加褒賞。故以寺卿。憲職序而寵之。無棄前功。在中後効。可依前件。

馬摠亡祖母韋氏贈夫人制

某勅。官馬摠。亡祖母韋氏。播茲懿範。貽厥嘉謀。施及孝孫。實居貴仕。將明餘慶。其在追榮。不唯垂裕後昆。抑亦光昭幽壤。宜降封丘之命。以慰令伯之心。可贈某夫人。

路貫等授桂州判官制

勅。藩隅之重。委以侯伯。軍府之要。掌在賓寮。貫等以文行修身。以智謀從事。佐廉問澄清之務。撫華夷錯雜之人。俾其父安。實在參贊。宜及寵命。以光所從。可依前件。

駙馬都尉鄭何除右衛將軍制

勅。周設七萃。漢列八屯。皆以拱衛王宮。肅嚴徽道。統茲騎吏。其屬親賢。某官鄭何。擢秀士林。挺質公器。以貞和陶其性。以禮樂文其身。善積德門。慶連戚里。況久踐名職。累著聲猷。念舊獎能。宜加榮寵。環列之尹。不易其人。俾宜力於爪牙。不失親於肺腑。可右衛將軍。餘如故。

封太和長公主制

勅公主之封號也。或以善地。或以嘉名。立愛展親。茲惟舊典。第四女端明成性。和順稟教。靜無違禮。故組紉有常訓。勳必中節。故環珮有常聲。歲茂穠華。日新淑問。乃眷肅雍之德。俾開湯沐之封。可封某公主。

宋朝榮加常侍制

勅河東節度都押衙試太子賓客兼御史中丞宋朝榮。嘗因戰功。擢領邊郡。揆能適用。故有轉遷。龍樓上寮。牙門右職。雖有兼命。未表殊恩。宜加騎省之榮。不改憲臺之重。以茲寵任。足報忠勳。爾其敬承。無墜乃力。可檢校左散騎常侍。餘如故。

贈陣亡軍將等刺史制

勅故某官某等。王師問罪。至於淄青。爾等同執干戈。親當矢石。忠而盡瘁。勇以亡身。或退卒於師。或進歿於戰。俱死王事。深側朕心。念捐軀於軍前。宜追命於泉下。郡守之貴。以示褒榮。可依前件。

諸道軍將等授官制

勅平齊之役也。諸軍指期。衆校合戰。某官等各輸戮勇。同樹勳勤。永思積日之勞。頗愧踰時之賞。故於獎授有所超遷。朝右貴班。宮坊清秩。或參憲處。分以命之。庶知我心。不忘忠力。可依前件。

裴度韓弘等各賜一子官并授姪女婿等制

勅某官某等。謁廟郊天。改元肆眚。是爲大慶。與衆共之。矧股肱心膂之臣。與吾同體。延賞任子。其可廢乎。爾等或以文華。或以吏職。有所修立。稟於義方。自當褒升。況密慶澤。俾舉展親之典。用叶推恩之道。猶子

愛壻各命以官。爾其敬承。無忝朝獎。可依前件。

入迴紇使下軍將官夏侯仕戡等四十人授卿監賓客諮議衛佐同制。

勅某官夏侯仕戡等。前命鄭權之入迴紇也。爾等參護使軍。用抵王命。悉心盡力。有恪恭跋涉之勤焉。宜以省寺軍衛之班。宮坊府邸之列。舉爲寶典。分以寵之。辯等旌勞。於是乎在。可依前件。

盧昂可監察御史。裏行知轉運永豐院制。

勅虢州司戶參軍盧昂。前負瑕疵。事多曖昧。今聞修省。善亦昭彰。況有大僚。同知情狀。且明非罪。仍舉有才。吾信人言。遂可其奏。爾思自効。無辱所知。可依前件。

張惟素亡祖紘贈戶部郎中制。

勅右散騎常侍張惟素。亡祖某縣令某。德合上玄。才終下位。命屈於當代。慶流於後昆。故其孝孫實登貴仕。經曰。無念爾祖。詩曰。貽厥孫謀。此言孫之謀能顯揚其先祖之德能垂裕於後也。不追榮於列宿。旌精德於太丘。可贈戶部郎中。

興州刺史鄭公達授王府長史李循授興州刺史同制。

勅鄭公達等。或以行稱。或以才舉。進修所致。班秩不卑。改命序遷。各適其用。且乘朱輪於郡邸。曳長裾於王門。士子名官至斯。亦不爲不遇也。立朝案部。各敬爾官。可依前件。

權知陵州刺史李正卿正除刺史制。

勅審材之要。考察爲先。吾之於人。試可乃用。李正卿頗闕吏道。恩假郡符。畏法愛人。善於其職。夫速旌其

能則吏勸。久於其政則化成。未可轉就。就加真秩。副吾知獎。無怠始終。可陵州刺史。

知渭橋院官蘇洵授員郎外依前職前進士王績授校書郎江西巡官制

勅。某官蘇洵。嘗以幹良。分領劇務。受任稱職。主者上聞。績既有成。賞安可闕。前進士王績。亦以藝學。藉名太常。著其令聞。及此慰薦。一以課進。一以才升。咸加班榮。同以褒獎。臺官校職。爾各欽承。可依前件。

湖南都押衙監察御史王瓘可郴州司馬依舊職制

勅。某官王瓘。郡司馬之官秩祿頗厚。凡在戎行。有軍課者。多兼命以優寵焉。而瓘以鞭弭囊鞬。從事征鎮。前後主帥。咸稱有功。宜加新命。仍率舊職。蓋欲旌往勞。而責來効也。爾其勉之。可兼郴州司馬。

安南告捷軍將黃士儻授銀青光祿大夫試殿中監制

勅。某官黃士儻。戎首來降。陪臣告捷。服勤靡盬。將命無違。宜以恩榮。獎其勞效。貴階崇秩。兼而寵之。可依前件。

王鎰可刑部員外郎制

勅。刑曹郎缺。朕詔執事。擇可以善於其職者。而殿中侍御史王鎰。自居殿中。能察非法。連鞠庶獄。多叶平允。加以溫敏靜專。可當是選。一歲之獄。決在秋冬。今方其時。宜敬乃職。

京兆府司錄參軍孫簡可檢校禮部員外郎荆南節度判官浙東判官試大治評事韓伋可殿中侍御史巡官試正字晁朴可試協律郎充推官同制

勅。某官孫簡等。凡使府之制。量職之輕重。以命官。揆時之遠近。以進秩。俾等衰有常序。遷次有常程。勞逸

均而名分定矣。簡自登憲司。佐相幕府。暨糾天府。皆有可稱。而伋等亦以文學發身。謀畫効用。荆陽浙右。實籍寶寮。況今之公卿大夫。皆由此塗出。慎爾職事。爾無自輕。可依前件。

冀州奏事官田練可冀州司馬兼殿中侍御史制

勅。某官田練。幹敏立身。公勤濟事。奉州將之手疏。達軍人之血誠。念其忠勞。宜有寵擢。假憲名於殿內。遷郡秩於治中。茲謂兼榮。爾其敬受。可依前件。

薛常颺可邢州刺史本州團練使制

勅。新授深州刺史薛常颺。平蔡之役。常領偏師。實立勳勞。遂膺寵任。今屬方隅多故。將守用能。宜以颺之長材。居邢之要地。故命魚符。換郡熊軾。移轅。夫事至而功成。時來而節見。此忠良之事業也。爾其念之哉。可依前件。

牛元翼可檢校左散騎常侍深州刺史御史大夫制

勅。某官兼御史中丞。權知深州事牛元翼。命官之要。凡試吏者。必俟成效。然後卽真。而元翼有理戎之才。扞城之略。權領軍郡。能修武經。士樂人安。厥有成績。是用假威。臺憲真拜郡符。仍以金貂。示其兼寵。吾聞忠臣立節。烈士垂名。其要無他。得時而已。勉竭材力。副予斯言。可依前件。

王衆仲可衡州刺史制

勅。前虔州刺史王衆仲。聚學修身。由文飾吏。累經任使。頗著良能。前牧南康。亦聞有政。宜新印綬。載領藩條。而衡湘之間。蠻越雜處。無以俗陋。不慎乃事。無以地遠。而怠厥心。副吾陟明。俟汝奏課。可依前件。

田盛可金吾將軍勾當左街事制

勅右金吾衛將軍田盛。夫仕宦至執金吾。古今所榮重也。而盛生勳德門。有文武略。居貴介而無佞。領誰何而有勞。言念徼巡之功。宜及轉遷之命。處左攝事。以表使能。可依前件。

陳楚男王府諮議參軍君賞可定州長史兼御史軍中驅使制

勅某官陳君賞。夙承義訓。幼事令聞。專繼弓裘之名。通知軍旅之事。因仍憲職。兼佐郡符。敬服寵章。勉從任使。

崔承寵可集州刺史制

勅太子左諭德崔承寵。早登班級。亟換星霜。自陳力於貴朝。屢奉辭於外國。職因事博。績以勞成。就列宮坊。旣申贊諭之美。分符郡邸。佇聞刺舉之能。宜勵公心。砥承寵命。

前貝州刺史崔鴻可重授貝州刺史制

勅前貝州刺史崔鴻。嘗牧貝丘。能修其職。及辭印綬。頗有去思。相時之宜。從人之望。俾換新命。再臨舊邦。況聞貯蓄時材。諸詳物務。而方州思理。侯伯薦能。勉勤爲政之心。勿忝知人之舉。

前吉州刺史李繁可依前吉州刺史制

勅前吉州刺史李繁。累奉藩條。皆奏課第。故移緡雲之政。俾牧廬陵之人。雖降璽書。未臨郡邸。屬魚章改造。熊軾追還。事旣謀新。職宜仍舊。勉率分憂之任。庶成來暮之謠。

瀛漠州都虞侯萬重皓可坊州司馬制

勅某官萬重皓。嘗資武力。早備戎行。頗歷艱虞。亦聞勤効。而藩隅未靖。遷轉從宜。言念前勞。宜加優秩。可坊州司馬。

崔墉可河南府法曹參軍制

勅。鄆曹觀察判官監察御史裏行崔墉。文行飾躬。公清奉職。士林推美。藩府薦能。軍旅之間。久資其用。忠勤之後。不殞其名。宜拔才於功臣。俾試吏於府掾。可依前件。

前河陽節度使魏義通授右龍武軍統軍前泗州刺史李進賢授右驍衛將軍並檢校常侍兼御史大夫制

勅。夫文武之才。內外迭用。軍國之任。出入遞遷。斯所以優勳賢而均勞逸也。某官魏義通。以戎功積久。榮委旌旄。某官李進賢。以軍課居多。寵分符竹。各勤其職。咸用所長。是以河陽三城鎮靜而不擾。泗濱一郡緝理而有勞。我有禁軍。爾宜分領。親信則倚爲心膂。動用則張爲爪牙。苟非其人。不付此任。咸假貂蟬之貴。仍兼憲職之勞。勉哉二臣。無替一志。可依前件。

李玄成等授官制

勅。黔州觀察使與度支使言玄成等。或蘊蓄能才。咨謀是籍。或分領劇務。課績有成。並可奏書。各遷憲職。勉勤乃事。無忝所知。可依前件。

馬摠准制追贈亡父請迴贈亡祖制

勅。夫積善者慶鍾於後。顯揚者光昭於先。而摠貴爲邦君。授爲國士。荷貽謀之訓。用率義之文。上獻表章。

有所陳乞。朕念其祖德。褒以臺郎。所以復陳寔必與之言。慰范喬泣涕之思。庶使幽顯兩無恨焉。可贈某官。

權知朔州刺史樂璘正授兼御史中丞制

勅。樂璘專習武經。旁通吏道。試補郡守。以觀其能。連帥上聞。果副所舉。夫審官之要在因其所長而任之。則政速成而化易就也。才既試可。官宜卽真。何以寵之。就加憲職。可朔州刺史兼御史中丞。

神策軍推官田鑄加官制

勅。田鑄官列環衛。職參禁軍。慎檢有聞。恭勤無怠。顧是勞効。例當轉遷。郡佐官寮。以示兼寵。

裴敞授昭義軍判官裴佺授義成軍判官各轉官制

勅。裴敞等。昭義義成。今之重鎮。實藉賓介。以參謀猷。而二帥皆勤於奉公。精於辟土。度才而授職。循序而請官。頗合所宜。咸可其奏。可依前件。

雲州刺史高榮朝除太子賓客河東都押衙制

勅。高榮朝常領銳師。入攻堅寇。因累獎賞。位至專城。才有所長。宜遷戎職。功不可忘。兼進榮班。勉事元戎。無替勞効。

韋綬等賜爵制

勅。韋綬等。去年春夏。同奉寢園。事集禮成。副吾哀敬。宜加封爵。以報恪勤。可依前件。

烏重明等贈官制

勅故某官烏重明等。夫生樹功勤。歿加褒飾。有國之常典也。重明等在興元初。常執勤於奉天。策勳爲定難。無祿卽代。有勞未圖。星歲屢遷。光塵不昧。聞韓之念。予心曷忘。俾慰幽泉。各追顯秩。可依前件。

羽林龍武等軍將士各加改轉制

勅。夫軍衛警則內外嚴。爵賞明則忠勤勸。爾等咸以材力列於禁營。屬去年已來。屢陳儀仗。雖加賜與。未答勤勞。因詔有司。舉行賞典。吾匪虛授。爾宜敬承。文武班資。各從序進。可依前件。

新羅賀正使金良忠授官歸國制

勅。新羅使倉部郎中金良忠等。朕以文明御時。以仁信柔遠。聲教所及。駿奔而來。況溟漲一隅。舟航萬里。爾慕我化。我圖爾勞。隨其等倫。命以寵秩。無替前効。永爲外臣。可依前件。

卷三十七

除裴垺中書侍郎同平章事制

門下。朕聞后德惟臣。良臣惟聖。在太宗時。實有房杜。贊貞觀之業。在玄宗時。實有姚宋。輔開元之化。咸克佑我烈祖。格於皇天。朕祇奉丕圖。懋繼前烈。思欲貞百度。和萬邦。建中於人。垂拱而理。永惟房宋之化。寤寐求思。至誠感通。上帝眷祐。果賴良弼。輔予一人。正議大夫行尚書戶部侍郎上柱國賜紫金魚袋裴垺。器得大爵。文爲國華。行有根源。詞無枝葉。忠敬恭順。貫之以誠心。方潔貞廉。輔之以通識。玉立不倚。金扣有聲。洎內掌綸言。密參樞務。嚴重有大臣之體。溫雅秉君子之文。每獻納之時。動有直氣。當顧訪之際。言

無隱情。遠圖是經。大事能斷。匡予不逮。時乃之功。及領他官。且司邦賦。會計務劇。出納事殷。投利刃而皆虛。委棼絲而必理。歷試已久。全才益彰。宜登中樞。以副僉望。夫宰輔者。下執邦柄。上代天工。爲國善龜。注人耳目。爾尙降乃德。以親百姓。廣乃志。以序九流。匡朕心。以清化源。從人欲。以致和氣。予欲宣力。汝爲股肱。予欲詢謀。汝爲心膂。予遠望於汝。弼勿謂不從。汝逆言於朕心。必求諸道。獨立勿懼。直躬而行。明聽斯言。敬踐乃位。嗚呼。罔俾房宋。專美於前。可中書侍郎同中書門下平章事。散官勳賜如故。主者施行。

除段祐檢校兵部尙書右神策軍大將軍制

門下爲君之心。惟功勞是念。有國之典。以賞勸爲先。其有輯睦師徒。保綏黎庶。盡勤王之節。建議塞之勳。則宜進以官常。委之軍要。兼文武之秩。參內外之榮。斯所以彰念功而明懋賞也。四鎮北庭行軍兼涇原等州節度支度營田觀察處置等使光祿大夫檢校工部尙書使持節涇州諸軍事涇州刺史兼御史大夫上柱國鴈門郡開國公段祐。早膺事任。累著公忠。名因義聞。位以勤致。自分戎閫。實控塞門。明舉武經。大修邊備。士卒有勇。保障無虞。虜不近邊。農皆狎野。展執珪之勤禮。瀝戀闕之深誠。方圖爾勞。且遂其志。夫六官庇職。大司馬列於前。二廣分師。上將軍處其右。長夏官以率屬。領環衛而拱宸。苟非信臣。安可兼委。嘉乃實効。副予虛求。將慎重其腹心。宜進登於喉舌。敬服休命。勉揚令圖。可檢校兵部尙書右神策軍步軍大將軍知軍事。散官勳封如故。主者施行。

除趙昌檢校吏部尙書兼太子賓客制

門下王者。以尙齒尊賢爲體。以念功任舊爲心。況文武之才有以兼備。則中外之職所宜迭居。所以寵舊

勳而優耆德者也。前荆南節度管內支度營田觀察處置等使金紫光祿大夫檢校兵部尚書兼江陵尹上柱國天水郡開國公趙昌聚學飾身修誠致用久膺事任累著勳猷統護交州威惠之聲克振鎮臨南海撫循之政有經自移部荆門馳心魏闕增修職貢益勵忠勤爰舉寵章用旌茂績夫望優四皓然後能調護春闈才冠六卿然後能紀綱會府惟爾年德足尚可以周旋其間宜增喉舌之榮以崇羽翼之任服我休命其惟懋哉可檢校吏部尚書兼太子賓客散官勳封如故主者施行

除鄭綱太子賓客制

門下王者重輔弼之任明進退之宜見可卽升知否則捨茲朕所以推誠不惑與物無私者也銀青光祿大夫守門下侍郎同中書門下平章事兼弘文館大學士上柱國陽武縣侯鄭綱早以令聞入參禁署永惟勤績出授台司期爾有終予不逮歲月滋久謀猷審微罔清淨以慎身每因循而保位既乖素履且鬱皇猷宜副羣情罷茲樞務朕以其久居內職累事先朝思厚君臣貴令終始俾就優閑之秩用申寬大之恩可太子賓客散官勳封如故主者施行

加程執恭檢校尚書右僕射制

門下職參揆務權摠戎麾必惟其人乃授斯柄自非望崇垣翰功著旂常則何以副儀形之求稱節制之任我有休命爾其敬承銀青光祿大夫檢校兵部尚書使持節滄州諸軍事兼滄州刺史御史大夫橫海軍節度支度營田滄景等州管內觀察處置等使上柱國邢國公食邑三千戶程執恭義勇立身忠愨成性聚爲事業發爲勳猷歷事先朝久專外闔殿邦而山岳比鎮奉國而金石爲心動修武經居有循化泊

執珪入覲。班瑞言旋。忠懇內激於心誠。恭順外形於詞氣。爰舉疇庸之典。稍增命秩之榮。方圖前勞。且有後命。朕思安封域。望在勳賢。任既切於腹心。位猶輕於喉舌。以守土勤王之効。雖進官封。念來朝述職之忠。未加寵數。特升右授。俾在中樞。勉終永圖。無替成績。可檢校右僕射。餘並如故。

除王佖檢校戶部尚書充靈鹽節度使制

門下。靜邊之要。選將爲先。夫有統馭之才。然後授以節制之任。有撫備之略。然後鎮以夷夏之衝。期乎攘遏寇虞。慎固封域。今予命爾。時謂得人。開府儀同三司。檢校刑部尚書兼右衛上將軍。寧塞郡王。食實封二百五十戶。王佖。忠厚立誠。果斷効用。慎始終而行。有枝葉。踐夷險而道無磷緇。早練武經。累從軍職。頃逢多壘。實佐元戎。節著臨危。功參定難。位由勞致。名以忠聞。自列六卿。且司七萃。星霜屢變。金石彌堅。宜申命於北轅。俾遏戎於南牧。進地官以崇新命。極勳秩以褒舊功。中簡朕心。外諧僉議。況五原重鎮。諸夏長城。修戎政。莫先於威聲。牧邊民。莫尚於惠實。師雜昆夷之悍。訓必在和。地爲獯虜之鄰。撫宜以信。勉率是道。往分朕憂。歲時之間。期於報政。委望斯在。爾其聽之。可檢校戶部尚書兼靈州大都督府長史。御史大夫。充朔方靈鹽定遠城節度副大使。知節度事。管內支度營田觀察處置押蕃落等使。仍賜上柱國。散官封實。封並如故。主者施行。

除闕巨源充邪事節度使制

門下。華夷要地。實爲蕃漢。鈇鉞重柄。必授忠賢。况乎椅角諸軍。金湯中夏。有坐甲護邊之旅。任切於捐循。有引弓犯塞之虞。寄深於備禦。內作心腹。外張爪牙。苟非信臣。不在茲選。奉天定難。功臣開府。儀同三司。

檢校尚書右僕射兼羽林軍統軍御史大夫上柱國定襄郡王食邑一千三百戶閻巨源備知虜態。明練兵符。永惟頗牧之能。宜授邠邠之寄。長南宮而遷左揆。壯西郊而委中權。旣圖前勞。且佇來効。於戲。十聯之帥。可以觀政。萬夫之長。可以樹勳。勉弘令猷。副我休命。可檢校尚書左僕射。使持節邠州諸軍事。兼邠州刺史。御史大夫。充邠寧慶等州節度管内支度營田觀察處置等使。散官勳封並如故。主者施行。

授吳少陽淮西節度留後制

門下。議事以制。擇善而行。是適變通。庶臻康濟。此王者所以弘德而息人也。況關外重寄。淮右成師。建有德以統藩方。擢有才以領留府。抑惟令典。今舉行之。彰義軍馬軍先鋒兵馬使正議大夫檢校右散騎常侍使持節申州諸軍事申州刺史兼御史大夫會稽郡王吳少陽忠勞許國。貴介承家。蓄武略於韜鈴。宣吏能於符竹。屬元戎旣歿。謀帥其難。朕將選衆以升。試可而用。推掌戎務。已逾歲時。而能和輯師人。勤修土貢。布寬簡有恆之政。動悅人情。守恭順不踰之心。靜俟君命。有嘉大節。可假中權。宜進列於貂蟬。俾增威於貔武。仍加勳秩。式茂寵章。嗚呼。重觀其能。我故委之。留事載佇其効。爾宜勉於後圖。敬思是言。往率乃職。可銀青光祿大夫檢校左散騎常侍依前兼御史大夫。使持節蔡州諸軍事。權知蔡州刺史。充彰義軍節度管内支度營田申光蔡等州觀察處置等使留後。仍賜上柱國封如故。主者施行。

除程執恭檢校右僕射制

門下。臣之節極乎忠功。君之柄先乎爵賞。欲忠者之克懋也。故爵有加等。欲功者之速勸也。故賞不逾時。古先哲王。實用茲道。今我命爾。因其舊章。橫海軍節度支度營田滄景等州觀察處置等使起復冠軍大

將軍左金吾衛大將軍員外置同正員檢校兵部尚書使持節滄州諸軍事兼滄州刺史御史大夫上柱國邢國公程執恭業傳將略名在勳籍。蘊天爵以修己忠孝兩全。竭臣節而事君。夷險一致。紀綱我列郡。節制我成師。勳揚休聲。靜著茂實。自合符徵。旅奔命出疆。暴露歷於三時。供億出於二郡。整衆而身作師。律伐謀而心爲戰鋒。服金革而無辭。當矢石而有勇。雨晦譏雞鳴之信。風高見隼擊之威。遠略旣申。茂勳方集。朕以恆陽之衆。蠢爾無知。毆彼生人。致之死地。每一念至。惻然久之。與其傷和而濟功。曷若舍垢而修德。旣罷師旅。爰圖勤勞。効且居多。賞宜從重。俾自夏官之長。特升右揆之崇。獎忠勸功。於是乎在。承我休命。爾其欽哉。可檢校尚書右僕射。餘並如故。主者施行。

除郎官分牧諸州制

漢宣帝云。與我共理者。其惟良二千石乎。誠哉是言。朕每三復。安得循吏。副吾此心。今之臺郎。一時妙選。嘗經任歷。率有才用。雖典曹庀事。其務非輕。而卹隱分憂。所寄尤重。是用並命分牧。吾人歲時之間。期於報政。戶部郎中某可某州刺史。兵部員外郎某可某州刺史。朕高懸爵賞。佇期酬効。咨爾夙夜。其念之哉。無俾龔黃專美前代。

除張弘靖門下侍郎平章事制

夫佐佑天子。變理陰陽。平章法度。登進賢哲。外撫夷狄。內安元和。使百官修其職。一物不失其所。此宰相之任也。朕思得良弼。馴致此道。咨予命汝。其殆庶乎。某官張弘靖。惟乃祖乃父。代居相位。咸有成績。書於旂常。爾有忠正恭肅。文以禮樂。日濟其美。振揚家聲。一時之人。謂之才子。亟登清貫。益著令聞。洎出刺陝。

部移鎮蒲坂。政不苟細。甚得人心。寮吏將卒。皆樂爲用。清簡之化。聞于京師。由是鄭風緇衣之好。漢庭玄成之美。朝望時議。翕然與之。人謀旣同。朕志亦定。乃用登爾于左輔。授爾以大政。尙克欽乃嘉命。業乃代官。竭其股肱。服我前訓。嗚呼。三代爲相。邦家之光。爾其念哉。無替乃前人之徽烈。

授范希朝京西都統制

闔闔風至。太白星高。謀帥護邊。國之大計。某官范希朝。忠貞勤儉。以爲質。惠和智勇。以爲用。一代名將。三朝信臣。朕以西邊列鎮三四。若有搃統。則易成功。思得良帥。有威名者。并護諸將。歲一巡邊。乘秋順令。揚其威武。則南牧之馬。引弓之人。知我有備。不戰而去。誰可任者。無如希朝。以爾有朔方之勞。有振武之効。功在疆場。名聞羌戎。惟實與聲。皆副是選。今拜爾爲大將。尊爾爲司徒。節制進退。一令諮稟。倚望如右。可不慎歟。可充京西都統。

贈吉甫先父官并與一子官制

勅某官李吉甫。出入將相。迨今七載。而能修庶職。敍彝倫。毗予一人。以底於道。夙夜不息。厥功茂焉。夫忠於君者。教本於親。寵其身者。賞延於嗣。於是乎有飾終之命。有任子之恩。所以感人心。而勸臣節也。惟茲舊典。可舉而行。

除李絳平章事制

昔在堯舜聰明。文思尙賴良臣。實相以濟。况朕薄德。不逮先王。是用急疾於求賢。置之於左右。俾承弼納。誨以匡不逮。言雖逆耳。必求諸道。事苟利人。咸可其奏。茲足以宣股肱之力。成天下之務。歷選多士。爰得

良輔乃降厥命。其聽之哉。某官李絳齊莊嚴重。內明外直。進退舉措。有大臣體。自參內職。每備顧問。忠讜之操。終然不渝。及貳地官。專領財賦。未逾周月。亦有成績。歷試多可。人望攸歸。俾登中樞。無易絳者。於戲。爾有以文學入仕。以正直奉上。才膺大用。職亦屢遷。十年之間。位至丞相。可以報國。在乎匪躬。欽哉懋哉。無忝朕命。

授韓弘許國公實封制

梁宋之交。水陸合會。人難難理。軍暴難戢。因變肆亂。往往有焉。唯此一方。朕常憂慮。今有良帥。鎮而撫之。政立功成。宜舉賞典。某官韓弘。以長材大略。作我藩臣。本於忠力。輔以政理。自分闡寄。在浚之郊。嚴貞師律。恭守朝憲。訓兵積粟。明罰信賞。軍和食足。禮節並行。河南晏如。於茲一紀。是則有大勳於國。有大惠於人。會課義功。無出其右。夫有過人之効。則有加等之命。古之王者。所以賞一人而天下勸者。用此道也。可不務乎。是用建於上公。授之眞食。以示殊寵。以旌殊績。欽我休命。子孫其保之。

除裴度中書舍人制

司動郎中。知制誥。裴度。以茂學懿文。潤色訓誥。體要典麗。甚得其宜。施之四方。朕命惟允。况中立不倚。道直氣平。介然風規。有光近侍。臺郎滿歲。班列當遷。綸閣之職。所宜眞授。可中書舍人。

除蕭俛起居舍人制

左補闕翰林學士蕭俛。頃居諫列。職司其憂。夙夜孜孜。拾遺左右。朕嘉乃志。遷在內庭。自參密近。益見忠讜。終始不替。尤足多之。記事之官。一時清選。俾膺是命。以弘勸獎。可守起居舍人。依前件。

除崔羣中書舍人制

庫部郎中知制誥翰林學士崔羣端厚和敏。飾以文學。溫溫忠敬。得侍臣之風。自列內朝。兼司誥命。事煩而益密。職久而彌精。六年於茲。勤亦至矣。况小大之事。常所訪問。盡規極慮。弘益居多。所宜寵以正名。式光榮職。敬乃嘉命。其惟有終。

獨孤郁守本官知制誥制

考功員外郎史館修撰獨孤郁爲人沈實。敏行寡言。粲然文藻。秀出於衆。累升諫列。再秉史筆。泊掌功論。率以直聞。求之周行。不可多得。而掖垣近職。綸閣重選。俯詢時議。爾宜居之。

授沈傅師左拾遺史館修撰制

京兆府鄠縣尉沈傅師庶職之重者。其史氏歟。歷代以來。甚難其選。非雄文博學。輔之以通識者。則無以稱命。今茲命爾。其有旨哉。昔談之書。遷能修之。彪之史。固能終之。惟爾先父。嘗撰建中實錄。文質詳略。頗得其中。爾宜繼前志。率前修。無忝爾父之官之職。可左拾遺史館修撰。

除許孟容河南尹兼常侍制

昔吳公袁安爲河南尹。守皆能以廉平清肅。馭吏教人。孰能繼之。我有良吏。某官許孟容。才志甚大。言論甚高。在臺閣間。藹然公望。嘗尹京邑。觀其器用。臨事能守。當官敢言。不吐剛以茹柔。不附上以急下。政無煩碎。甚合衆心。及是轉遷。頗有遺愛。河洛千里。都畿在焉。凡所選任。必歸望實。考言詢事。非爾而誰。不忘舊政。可立新績。仍以騎省中而寵之。

除李程郎中制

隋州刺史李程。頃以詞學入參訓命。旋以才用出領詔條。漢東大郡。委之共理。勵精爲政。三年有成。中外序遷。朝之彝典。尙書郎缺。爾宜補之。

裴克諒權知華陰縣令制

華陰令卒非選補。時調租勉農。政不可缺。前鎮國軍判官試大理評事裴克諒。久佐本府。頗有勤績。屬邑利病。爾必周知。宜假銅墨。試其才理。待有所立。方議正名。

贈高郢官制

故尙書右僕射高郢。立身從事。皆有本末。在亂不汙。可以言忠。守官不撓。可以言直。以道佐主。可以言正。以年致仕。可以言禮。有一於此。人鮮克舉。况備四者。不亦君子乎。天不憖遺。深用軫悼。宜加褒贈。以旌其風。仍俾善人。聞而知勸。可贈某官。

貶于尹躬洋州刺史制

中書舍人于尹躬。其弟舉謨。賊汙狼藉。雖無從坐之法。合當失教之責。然以典職詔命。恭勤五年。我卽念勞。爾宜思過。俾居近郡。茲謂得中。

贈裴垍官制

故太子賓客裴垍。忠正恭慎。佐予爲理。事君盡禮。徇國忘身。積憂與勞。遘成疾恙。以至淪逝。念之惻然。頃屬多故。未申禮典。永惟褒飾。寧忘於心。今則命數之間。宜從加等。庶使忠於君者。有以勸焉。可贈某官。

除軍使邢寧節度使制

金方之氣凝爲將星。王者法天。選命豪傑。授之以鉞。拜爲將軍。以威西戎。以護中夏。而倚望若是。安可非其人哉。某官某。出忠入孝。仗信抱義。行有餘力。學劍讀書。鬱然將材。用兼文武。自領軍衛。爲我爪牙。夙夜警巡。不懈於位。材官知訓。環列增勳。服勤五年。茲爲成績。可以移用。使之守疆。郇邠大藩。控扼胡虜。若得良將。則無外虞。知臣者君。非爾不可。仍加副相。以重是行。勲樹勤勞。式光寵擢。

除韋貫之平章事制

周宣漢宣。繼之體主。一得申甫。一得魏丙。咸克致理。號爲中興。朕嗣位以來。永鑒前烈。惟是賢俊。寤寐求思。歷選周行。乃獲時彥。宜以政柄舉而授之。某官韋貫之。溫重明正。國之公器。當官必守。臨事能斷。簡在朕志。迨今累年。乃者擢居諫司。以觀其直。出領符竹。以觀其理。煩之劇務。以觀其用。訪之大政。以觀其體。歷試必中。衆望允屬。倚之爲相。僉曰宜哉。可中書侍郎同中書門下平章事。夫臣事君。以忠。后從諫。則聖靡不有始。鮮克有終。理化不成。恆由於此。今我與爾。永終是圖。雖休勿休。以臻其極。嗚呼。二宣之業。吾有望焉。

除拾遺監察等制

渭南縣尉庾敬休等。咸文行清茂。士之秀者。宜從吏列。擢在朝行。各隨才用。分命以職。司諫執憲。佇有可稱。

除范傳正宣歙觀察使制

古之諸侯。三載考績。選其賢者。命爲長率。所以勸功行而興理化也。蘇州刺史范傳正文學政事。二美具焉。選自郎署。出分符竹。江南列郡。連領者三。所至之部。悉心爲理。明諭朝旨。恭守詔條。謹身省事。以臨其下。政簡而肅。意誠而明。吏不能欺。人是以息。而去思之歎。來暮之謠。往復有政。聞於人聽。雖古循吏。蔑以加之。朕以陵陽奧壤。土廣人庶。其地有險。所寄非輕。跡其前効。可當此選。况黜歛之遺愛。尙在。吳興之新政。方播。升車便道。足慰人心。固當望風自安。計日而理。倚注於爾。往宜欽哉。

邊鎮節度使起復制

執親之喪三年禮也。聖人不得已而奪之。金革之事。無避權也。忠臣不得已而從之。某官某。握我兵要。守在塞門。忠勇威惠。合以爲用。師人悅附。戎虜畏服。迨彼諸部。聞其姓名。况歲廣屯田。日討軍實。載陳遠略。方集大勳。自罹家艱。遽致公政。茹荼銜恤。已過旬時。而軍旅不可以無帥。疆場不可以無主。且慮人慢。或生戎心。蓋臣節大於孝思。王事急於情禮。捨輕從重。徇公滅私。變而通之。正在於此。俾加戎秩。用護封邊。往服舊職。無違朕命。

除任迪簡檢校右僕射制

書曰。德懋懋官。功懋懋賞。此先王所以匡飾天下也。有其忠勞。輸於國。惠澤及於人。高位厚賞。朕無所愛。某官任迪簡。頃以本鎮元戎來朝。俾佐師律。實掌留務。屬偏裨不軌。誘動軍部。亂行忤命。至於再三。而迪簡冒白刃於戎首。置赤心於人腹。挺身誓衆。罔不率從。羣情旣歸。因命爲帥。况閭閻蕩析。倉廩匱竭。野有餓殍。軍無見糧。又能推恩信以結衆心。率勤儉以勸生業。士旅悅附。流庸思歸。周月之間。泰然安堵。開置

幕府叶和親鄰。俾予無憂。時乃之力。夫爲將守立功如斯。不加爵賞。何勸來者。建官惟百。端揆長之。自非勳賢。不在此選。以是加等之命。寵乃殊常之績。俾增威於閩外。仍就拜於軍中。爾其欽哉。無替厥命。

除常侍制

某官某往以強毅剛直見稱於時。擢在佐曹。俾之駁議。旋以言動小有過差。左遷遠藩。亦聞有政。雖經三黜。僅歷二紀。而堅直之氣終然不渝。人之所難。亦足嘉尚。宜可束帶立之於朝。正色讜言。時有所取。俾登西掖。仍珥右貂。從容前後。以備顧問。

除裴武太府卿制

聚九州之賦。辯百貨之名。按其度程。謹其出納。孰爲主者。外府上卿。務殷秩崇。不易其選。某官裴武。有通敏之識。有倚辯之才。以茲器用。早膺任使。小大之務。罔不勵精。累有勤績。存乎官次。而受藏之府。國用所資。若非使能。何以集事。俾昇顯列。仍委劇務。爾宜率其官屬。欽乃職司。會努藏出入之要。修權量平校之法。以遵成式。無使改易。謹而守之。斯爲稱職。

卷三十八

杜佑致仕制

勅。盡悴事君。明哲保身。進退始終。不失其道。自非賢達。孰能兼之。司徒同平章事。杜佑。以長才名略。爲國元臣。歷事四朝。殆逾三紀。出專征鎮。爲諸侯帥。入贊台衮。爲王室輔。嘉猷茂績。中外洽聞。寵任旣崇。勤勞

亦至。頃以年登致仕。退請懸車。方深倚注。久未得謝。勉就牽率。迨茲累年。今抗疏披誠。至於數四。敦諭頗切。陳乞彌堅。期於必遂。理不可奪。守沖知止。佑實有焉。賢哉大夫。今古同道。宜從優異之命。式表褒崇之禮。尚資耆望。俾傳東朝。時太子太師致仕。如天氣晴和。亦任朝謁。昔祁奚申叔。皆就請老。國有大事。入議否臧。忠臣愛居。豈必在位。永觀前事。期副茲懷。

鄭涵等太常博士制

某官鄭涵等。並早以文行。久從吏職。輦流之間。頗爲淹滯。况雅有學識。進修不已。禮官方缺。宜當此選。凡朝廷禮制。或損益有疑。中外謚議。或褒貶不決。爾爲博士。皆得正之所任。非輕各敬。乃事並可。太常博士。除韓臯東都留守制。

國之都府。半在東周。未遑時巡。方委留鎮。非位望崇盛。加之勳舊者。則不足以允僉屬而副重寄也。刑部尚書韓臯。名德之後。鬱然公才。正行通規。貫於終始。累遷臺府。連鎮藩維。入修職業。出樹風聲。故事遺愛。著聞中外。况一登朝序。殆三十年。舊德耆望。無居其右。俾乂東夏。僉以爲然。乃加冢卿。以示崇寵。敬服嘉命。永孚於休。可檢校吏部尚書東都留守。

中書舍人韋貫之授禮部侍郎制

典郊祀之禮。獻賢能之書。今小宗伯實兼二事。非直清明正者。不足以處之。中書舍人韋貫之。沈實堅峻。文以禮樂。行成於內。移用於官。公直之聲。滿於臺閣。頃以詞藻。選登禁掖。秉筆書命。時稱得人。久積勤勞。宜有遷轉。可使典禮。以和神人。可使考文。以第俊秀。儀曹之選。僉議所歸。往修乃官。無替厥問。可禮部侍郎。

郎。餘如故。

薛存誠除御史中丞制

庶官之政得人則舉。況中執憲準繩之司。所以提振紀綱。端肅內外。蓋一職修者。其斯任之謂歟。給事中薛存誠。選自郎署。列於左曹。居必靜專。言皆讜正。章疏駁議。多所忠益。可以執憲。立於朝端。况副相方缺。臺綱是領。糾正百官。爾得專之。夫直而不絞。威而不猛。不附上以急下。不犯弱以違強。率是而行。號爲稱職。敬服斯命。往其懋哉。可御史中丞。餘如故。

前長安縣令許季同除刑部郎中前萬年縣令杜羔除戶部郎中制

前長安縣令許季同。前萬年縣令杜羔等。頃自郎署分宰京邑。而長吏待之。小乖常禮。雖同辭託。故動未得中。然遠恥以退。道不失正。各從免職。亦旣踰時。况文行政能。皆推於衆。詢諸時議。宜有遷授。尙書郎缺。方選才良。憲部人曹。俾膺並命。季同可刑部郎中。羔可戶部郎中。

京兆少尹辛祕可汝州刺史制

京兆少尹辛祕。頃守吳興。時逢擾亂。安人殄寇。節効可稱。出倅戎車。入貳京輦。亦有政績。著於官常。今以汝汾軍郡之大。方求良吏。委之分憂。詢事考能。爾當其選。往卽乃土。以舒吾人。可汝州刺史。

除李遜京兆尹制

近歲京兆長吏數遷。誠不便時。抑有其故。或鈐鍵不謹。吏緣爲姦。或鉤距太煩。人受其弊。旣非中道。皆不得已而罷之。宜求恬智寬猛相濟者。親諭斯旨。使久於其職。以息吾人。浙江東都觀察使御史中丞李遜。

十年以來。連守四郡。或紛擾之際。或荒饑之餘。盛惠所加。罔不和輯。賞其殊績。擢在大藩。自臨會稽。一如舊政。況省科禁。以便俗。通津梁。以息征。動遵詔條。深副朝旨。江南列鎮。良帥則多。集課程功。爾爲稱首。而內史之選。久難其人。今予所求。唯爾可使。雖表率州部。其委非輕。然尹正京師。所資尤急。宜輟材於浩壤。佇觀政於輦轂。望爾有成。無替厥命。可權知京兆尹。

除孔幾等官制

渾金璞玉。方圭圓珠。雖性異質。殊皆國寶也。是故能官人者。亦辯而用之。諫議大夫孔幾。靜專貞白。不涉聲利。執言守事。無所依違。駕部郎中薛存誠。廉潔直方。飾以詞藻。中立不倚。介然風規。吏部員外郎王涯。端明精實。加之以敏懿。文茂學。尤推於時。並歷踐朝行。恪勤官次。諫垣郎署。藹其休聲。宜加公獎。擢在近侍。左右禁闔。可以同升。必能評奏臺議。發揚綸誥。臨事有立。屬詞可觀。各隨所長。分命以職。祇奉乃事。無替厥猷。幾存誠並可給事中。涯可兵部員外郎。知制誥。

除李建吏部員外郎制

勅。六官之屬。選部郎首之。歷代以來。諸曹郎之中。擇其踐歷久。考第高。加以有器局。律度者。遷焉。今之選任。亦由是矣。兵部員外郎李建。文行才理。公勤課績。可謂具美。宜居厥官。歲調方殷。勉勤爾事。可吏部員外郎。

除劉伯芻虢州刺史制

給事中劉伯芻。以文雅才名。給事左闕。實掌駁議。再逾歲時。亦謂恪勤。宜從遷轉。而虢略近郡。黎人未康。

藉爾良能。爲予撫字。懸賞佇効。勉哉是行。可授虢州除史。

除周懷義豐州刺史天德軍使制

西受降城。尤居邊要。西戎北虜。介乎其間。委之郡符。建以戎號。將守之選。宜乎得人。前汝州刺史周懷義。久列禁衛。嘗從征伐。又領軍郡。率著勤功。宜加獎用。可屬憂寄。况茲要鎮。實扼戎吭。犄角諸軍。局鑄右地。牧人訓旅。兼領非輕。無替前勞。在申後効。可豐州刺史天德軍使。

除某官王某魏博節度使制

師長之選。重難其人。况河上列城。鄴中雄鎮。初喪良帥。思安衆心。若親與仁。方膺是命。某官王某。出忠入孝。根乎至性。好學樂善。出於餘力。發自修己。施於爲政。可以守土。可以長人。今兩河之間。三軍乏帥。是用命爾。領茲大藩。澄清魏風。輯理相土。爲我垣翰。永孚於休。往其欽哉。無替厥職。可魏博等州節度觀察使。

除某節度留後起復制

懋勳德者。慶鐘於嗣。襲忠順者。教本於親。於是乎有代及之恩。有賞延之命。所以光子道而激臣節也。茲惟舊典。可舉而行。某官某。惟乃祖父。勤勞王家。咸有忠功。書於甲令。降及於爾。亦克負荷。早承義訓。久倅戎麾。自罹憫凶。能著誠敬。恭俟朝命。靖安人心。雖在幼冲。足可嘉獎。今屬元戎初喪。衆望顛然。宜選親賢。以爲統帥。留府之事。俾爾專之。加戎秩以奪哀。遷冬卿以示寵。奉揚新命。無忘前修。爾宜懋哉。懸賞佇効。可節度留後。檢校工部尚書。

除薛平鄭滑節度制

武牢以東。至於白馬。形勢之地。水陸之會。宜擇文武兼備者。以爲守臣。右衛將軍薛平。自司禁旅。爲我爪牙。訓整警巡。能宣其力。嘗使於絕國。可謂有勞。嘗牧於大郡。亦聞有政。况忠厚爲質。通明爲用。秉吏道之刀尺。襲將門之弓裘。可以爲三軍之帥。可以理千乘之賦。俾輟才於北落。往節制於東方。爾宜式遏四封。輯寧百衆。明簡稽以實軍旅。信賞罰以勸吏人。勉率乃職。無忝厥命。仍以冬卿副相兼而寵之。可檢校工部尙書兼御史大夫。

除盧士攻劉從周等官制

君有舉。左史得書之。政有闕。諫官得補之。二職者。歷朝之清選也。前侍御盧士攻。嘗在西川時。爲從事。亂危潛伏。能潔其身。前監察御史劉從周。頃佐宣城。奉公守政。端士之操。終然不渝。時所稱論。並宜甄獎。况學術詞藻。見推於衆。並命清貫。僉以爲宜。記事盡規。各佇能効。士攻可起居郎。從周可右補闕。

張正一致仕制

前諫議大夫張正一。學行器用。爲時所稱。擢居諫官。冀効忠讜。雖年齒未暮。而衰疾有加。所宜頤養。不可牽率。俾移優秩。以從致政。可國子司業致仕。

張正甫蘇州刺史制

浙右列城。吳郡爲大。地廣人庶。舊稱難理。多選他部二千石之良者。轉而遷焉。鄧州刺史張正甫。自領南陽。僅經三載。廉平清簡。以臨其人。人安政和。理行第一。宜以大郡。推而廣之。用旌前勞。且佇來効。可蘇州刺史。

崔清晉州刺史制

左司郎中崔清。以才良行敏。補尚書郎。頗積功勳。宜加獎任。頃嘗爲郡。亦聞有政。平陽舊壤。時謂名藩。得才與能。方可共理。安人訓俗。佇有成績。可晉州刺史。

除柳公綽御史中丞制

勅中憲之設。糾謬懲違。一引其綱。百職具舉。非清與直。不稱厥官。諫議大夫柳公綽。忠實有常。文以詞學。介然端直。有古之遺風。頃居臺憲。累次郎位。持平守正。人頗稱之。擢首諫司。器望益重。今副相缺位。中司專席。惟有守者。可以執憲。惟無私者。可以閑邪。詢事審官。爾當是選。光昭新命。振起舊章。宜一乃心。以揚其職。可御史中丞。

除田興工部尚書魏博節度制

馭下安人。其道不一。或序能以次用。或因効以拔才。所命雖殊。同歸共理。某職某官。田興時屬本軍。初喪戎帥。亂政或啓。羣心不寧。而興列在偏裨。奮其義勇。謀成必中。事至能斷。智略所及。指麾所加。一軍獲安。百衆悅附。連獻章疏。恭俟制命。有節有禮。朕用嘉之。夫以將材。如彼軍情。若此元膺。不次之舉。可責非常之功。是用寵之。冬卿。擢爲大將。仍以印綬。就拜軍中。行乎敬之哉。無墮乃力。可檢校工部尚書兼御史大夫魏博等州節度觀察等使。

除鄭餘慶太子少傅制

東朝三少。歷代重選。不必備位。在乎得人。吏部尚書鄭餘慶。貞明儉素。有古人風。發自修身。施於爲政。出

入中外多歷要重咸有勤績存於官次况動中禮法學綜儒玄是謂羽儀之臣可居師傅之任輔我元子爾其勉歟可太子少傅

除裴堪江西觀察使制

江西七郡列邑數十土沃人庶今之奧區財賦孔殷國用所繫茲爲重寄宜付長才同州刺史裴堪素蓄器幹久經任遇日者資其忠諒入爲諫議大夫藉其良能出爲左海翊曾未周歲政立績成區區一郡未盡其用鍾陵要鎮可以委之夫簡其條章平其賦役徇公率正以臨其人而人不安未之有也祇服厥命往修乃官仍兼中憲以示優寵可江西觀察使兼御史中丞

贈杜佑太尉制

生有爵祿歿有褒贈此王者所以崇哀榮之禮厚君臣之恩况有輔臣所宜加等某官致仕佑以通濟之才公忠之節逢時入用爲國大臣外領藩鎮內參台鉞積勳盡悴迨過三紀左右於位亦旣八年天不憚遺奪我元老憫然興歎實軫於懷永言褒榮俾峻禮命上公之秩用賁幽靈嗚呼錄舊旌勞知予不忘可贈太尉

除孔戢萬年縣令制

京邑令缺多擇尚書郎有才理者補之兵部員外郎孔戢自御史府遷夏官之屬凡所蒞職一心奉公在郎署間稱有名實加以文學綠飾吏能俾宰京劇佇有成効

除裴向同州刺史制

馮翊之地。密邇郊畿。分內史之政。參京師之化。俾善所職。其在得人。京兆少尹。裴向器。蘊利用。學通政事。久試吏治。頗着良能。累守大郡。入亞天府。奉上擢下。皆有可稱。左輔之重。爾膺其選。況征賦猶重。人庶未康。實望良才。與之共治。勉副所舉。往修厥官。可同州刺史。

除武元衡門下侍郎平章事制

朕嗣守丕業。殆將十年。實賴一二輔臣。與之共治。故外鎮方域。則仗以爲將。有絳侯厚重之資。有邴吉寬大之風。自登台司。克厭人望。頃屬巴蜀。軍後人殘。權委節旄。俾往鎮撫。信及夷貊。恩加疲瘵。每因利以施惠。不易俗而修教。政無苟得。人用便安。惠茲一方。時乃之績。報政既久。屬望益深。宜歸左輔。以參大政。夫坦然公道。可以敍衆才。曠然虛懷。可以應羣務。弼違救失。不以尤悔爲慮。進善懲惡。不以親讎自嫌。用此輔君。足爲名相。欽率是道。往復乃官。可門下侍郎同中書門下平章事。

除李夷簡西川節度使制

征鎮之大。實惟蜀川。西距於戎。南漸於海。有重江複山之險。有長轂堅甲之旅。水陸交會。華夷雜居。疇能治之。我有良帥。山南東道。節度使某官李夷簡。以正事上。以簡臨下。仗茲器用。累當任遇。執憲之難也。爾爲臺丞。其職甚舉。司計之重也。爾調邦賦。其効可稱。爰資長才。出領重鎮。自摠符鉞。於漢之南。專奉詔條。削去弊政。均穀籍不一之賦。罷舟車無名之征。近悅遠來。歸如流水。俗用丕變。人迄小康。三載考功。爾爲稱首。進其右秩。遷於大藩。以均惠乎四方。以旌勸乎羣吏。昔文翁明於教化。仲彞優於政能。巴蜀之間。遺美猶在。不替前効。可以嗣之。佇聞有成。用光厥命。可檢校吏部尚書劍南西川節度等使。

除袁滋襄陽節度制

漢以二千石之良者入爲公卿。周以六官之賢者出兼侯伯。內外之任。所命則殊。至於治軍國。寵忠賢。其致一也。戶部尙書袁滋。奉上甚勤。臨下甚甚。安人附衆。尤是所長。頃資其能。移鎮東郡。略其科禁。緩其征徭。政不滋彰。人用休息。在部七載。績成課高。璽書徵還。益聞遺愛。老幼遮道。事鄰古人。朕方勤卹疲民。褒獎循吏。累月再命。其有旨哉。舉鄭滑之政也。故旌武公之美。寵以司徒。憂襄漢之人也。故仗叔子之才。委茲征鎮。類能而使。其在此乎。勉揚厥聲。無替前効。可某官山南東道節度等使。

歸登右常侍制

近侍之列。騎省爲貴。歷代迄今。選任頗重。必詢望實而後命之。工部侍郎歸登。朴中沈厚。心無詭詐。介圭不飾。止水無波。澹然自居。以致名稱。抱此素行。歷踐清貫。掌議左掖。貳職冬官。歲時滋深。體望益茂。可以備顧問。應對之選。列言語侍從之臣。冠附貂蟬。立之於右。訪諸時論。僉以爲然。可右散騎常侍。

李程行軍司馬制

隋州刺史李程。頃自周行。出分憂寄。漢南大郡。守之五年。頗著良能。宜當選獎。況專習文學。通知兵事。西南重鎮。初委元戎。慎選副車。爾當此舉。三軍之重。俾往貳之。仍加憲職。以示優寵。可御史中丞劍南西川行軍司馬。

李綱虞部郎中制

金州刺史李綱。雅有文藝。飾以政事。早從吏職。久領郡符。謹慎廉平。頗副所任。虞曹郎缺。命以序遷。敬茲

寵名。勉守厥位。可尙書虞部郎中。

牛僧孺監察御史制

河南縣尉牛僧孺。志行修飾。詞學優良。頃對策於庭。其詞亮直。累從吏職。頗謂滯淹。訪諸時論。宜當朝選。俾升憲府。以觀其才。可監察御史。

裴克諒量留制

華州刺史裴華陰。令裴克諒。在官清白奉法。考秩向滿。其政如初。借留三年。用觀成績。朕方旌求良吏。俾養黎元。適副所懷。宜可其奏。

張聿都水使者制

前湖州長史張聿。頃以藝文。擢升朝列。嘗求祿養。出署外官。名不爲身。志亦可尙。喪期既畢。班序當遷。俾領水衡。以從優秩。可都水使者。

薛伾鄜坊觀察使制

鄜時延安。抵於中部。羌夷種落。散在其間。戎夏雜居。易擾難理。宜選寬明之使。通知邊事者。委以符節。而糾綏之。右金吾將軍薛伾。服勤戎職。練達吏道。出入中外。縣歷歲年。能一乃心。以宣其力。自加寵遇。再執金吾。徼巡有嚴。夙夜匪懈。在公若是。何用不臧。况爲人沈靜。內肅外和。按俗守封。是其所善。宜輟務於誰何。俾宣風於廉察。庶乎勞徠諸部。綱紀列城。奉詔條以安人。參戎索以訓旅。欽承厥命。往復乃官。仍踐冬卿。式光重寄。可檢校工部尙書。充鄜坊等州觀察使。

韓愈比部郎中史館修撰制

大學博士韓愈。學術精博。文力雄健。立詞措意。有班馬之風。求之一時。甚不易得。加以性方道直。介然有守。不交勢利。自致名望。可使執簡。列爲史官。記事書法。必無所苟。仍遷郎位。用示褒升。可依前件。

李暈安州刺史制

宿州刺史李暈。勳閥之門。嗣生才略。久參戎衛。頗著勤勞。試守列城。觀其爲政。屬汴泗之右。創畫州居。府署城池。委之經始。一日必葺。三年有成。且聞公勤。宜有遷轉。重分憂寄。再佇良能。往安吾人。無忝厥命。可安州刺史。

竇易直給事中制

前御史中丞竇易直。器質識智。厚重開敏。文合法要。學通政經。累踐臺郎。擢司邦憲。寬猛舉措。甚得其中。官不易方。府無留事。前因病免。今以才遷。俾升瑣闥。以備顧問。凡制令倭議。官獄典章。苟有依違。皆得駁正。所任不細。宜敬乃官。可給事中。

孟簡賜紫金魚袋制

漢制。二千石有政績者。就加寵命。不卽改移。蓋欲使吏久於官。人安其化也。常州刺史孟簡。簡易勤儉。以養其人。政不至嚴。心未嘗怠。曾未再稔。績立風行。歲課郡政。毗陵爲最。方求共理。實獲我心。宜加命服。以示旌寵。庶俾羣吏。聞而勸焉。宜賜紫金魚袋。

盧元輔杭州刺史制

河南縣令盧元輔。早以學藝列在周行。嘗守商都。頗聞有政。再領京縣。益見其才。江南列郡。餘杭爲大。征賦尤重。疲人未康。籍爾登車。往分憂矚。勞傑安輯。稱朕意焉。懸賞旌能。以佇報政。可杭州刺史。

錢徵司封郎中知制誥制

中臺草奏。內庭掌文。西掖書命。皆難其人也。非慎行敏識。夙學懿文。四者兼之。則不在此選。祠部郎中翰林學士錢徵。藹然儒風。粲然詞藻。縝密若玉。端直如弦。自參禁司。益播其美。貞方敬慎。久而彌彰。應對必見於據經。奏議多聞於削藁。迨令六載。其道如初。嘉其忠勤。宜有遷擢。俾轉郎吏。仍參綸閣。茲乃榮獎。爾其敬承。可依前件。

獨孤郁司勳郎中知制誥制

考功員外郎知制誥獨孤郁。學識文行。時論所推。選自外郎。擢居右闥。綸言樞命。既重且推。委以發揮。甚聞稱職。而端諒忠謹。介然自居。爲臣若斯。足可嘉獎。官滿當歲。職亦逾年。宜從美遷。以光近侍。可司勳郎中知制誥。

卷三十九

與王承宗詔

勅王承宗。朕臨馭天下。及此五年。三叛誅夷。四方清泰。不以武功自負。常推恩信爲先。爾父云亡。卽欲命卿受詔。而遠近方鎮。內外人情。紛然奏陳。皆云不可。朕以卿累代積勳賢之業。一門有忠義之風。功著艱

危恩連姻戚。難中心是念。而衆請難違。可否之間。久不能決。然亦欲觀卿進退之禮。察卿忠孝之心。卿自罹憫凶。屬經時月。待使臣而動。皆得禮奉。章疏而言。必由衷。請獻官員。願輸貢賦。而又上陳密款。遠達深誠。潔身而謀。出三軍。損己而讓。推二郡。斯有以得臣子之大節。知君親之大恩。卿心旣然。朕意亦定。特加新命。仍撫舊封。今授卿起復左金吾衛大將軍。檢校工部尚書。充成德軍節度使。恆州刺史。恆冀深。趙等州觀察等使。兼御史大夫。仍賜上柱國。并賜告身。旌節等件。想卿忠孝。哀感兼深。其德棣兩州。以卿進讓。元欲於卿親屬之內。選授一人。在法雖有推恩。相時亦恐非便。今所以除薛昌朝。德棣兩州觀察使。昌朝昔嘗事卿先父。今又與卿親鄰。卿宜具以誠懷。令報昌朝知悉。卿今授命之後。足得節制三軍。使其不失事宜。方見卿之忠盡。昨者衆情易惑。非卿不能効此誠。羣議難排。非朕不能斷此意。所宜保持大義。勉勵遠圖。深念斯言。永副予望。其當軍大將已下。各宜特與改轉。卿卽條錄聞奏。其官健等亦宜量加優賞。想宜知悉。

答李遜等謝恩令附入屬籍表

卿先父頃逢多難。嘗立大功。每想忠勞。豈忘存歿。念先臣之績。雖書名於太常。推同姓之恩。更附籍於宗憲。正俾增榮於一族。兼延寵於九原。卿等或詩禮承家。或弓裘奉業。咸鍾新命。慶屬本枝。省所謝陳。深嘉誠懇。

祭盧虔文

維元和四年歲次己丑七月日。皇帝遣某官某。以清酌庶羞之奠。致祭於故祕書監。贈兵部尚書盧虔之

靈。惟爾質性端和。風猷茂遠。名因文著。位以才升。秉大節而事君。始終一致。陳義方而訓子。忠孝兩全。甲族推華。士林增美。久在貂蟬之列。近遷圖籍之司。方延寵光。遽闕幽窆。褒獎之命。雖已表於哀榮。遺奠之恩。宜再申於軫悼。魂兮不昧。鑒此誠懷。尙饗。

批李夷簡賀御撰君臣事跡屏風表

朕思求理化。親閱典墳。至於去邪納諫之規。勤政慎兵之誠。取而作鑒。書以爲屏。與其散在圖書。心存而景慕。不若列之繪素。目覩而躬行。庶將爲後事之師。不獨觀古人之象。卿詞彰恭順。義見忠規。省覽再三。深叶朕意。所賀知。

批百寮嚴綬等賀御撰屏風表

朕烈祖太宗。以古爲鏡。用輔明聖。實臻理平。垂作孫謀。每懼乎失墜。取爲殷鑒。遂飾之丹青。至若明君直臣。前言往事。森然在目。如見其人。論列是非。旣庶幾爲座隅之誠。發揮獻納。亦足以開臣下之心。况卿等職在儀形。政當補察。各勤所任。共副茲懷。所賀知。

答杜兼謝授河南尹表

卿文通吏道。學達政源。凡歷官常。輒聞績効。觀能以授。俾亞理於三川。見可而遷。宜專臨其一府。盡委封畿之政。仍兼運漕之權。歲時之間。佇有勤効。勉恭爾職。重副予懷。所謝知。

與茂昭詔

勅茂昭。盧挾等。至省所奏。恆州事宜。并別論情。陳獻者具悉。卿望重勳賢。寄崇藩鎮。參謀廟算。寵接國姻。

累上表章。繼陳誠款。永言智略。已見匡濟之才。載念公忠。益表感知之志。若非勞瘁憂國。義勇忘家。則丹赤之心。不能至此。想風興歎。至於再三。所緣恆州事宜。朕亦思之甚熟。但以武俊率身仗順。於國有功。忠勳所延。宜及後嗣。承宗又密陳深款。遠獻忠誠。既念舊勞。已降成命。計其奉詔。必合感恩。如或乖違。續有商議。卿宜以睦鄰爲事。體國爲心。想卿誠懷。當悉朕意。

與師道詔

勅師道。省表具悉。卿業重相門。位崇戎闔。忠輸於國。行著於家。久而益彰。嘉歎無已。所奏亡兄師古。請列於私廟。昭穆者。此乃心推孝友。誠切恭敬。覽表見情。深足嘉尚。但以祠廟所見。貴於禮成。師古雖則始營。至卿方行。祈禮。卽卿爲廟主。固合其宜。况師古爵位尊崇。弘選自合。祈廟別立祠宇。使其主之。奉以蒸嘗。亦非乏祀也。已令有司重議如此。頗謂得中。且叶禮經。卿宜知悉。

與於陵詔

勅於陵。省所賀安南破環王國賊帥李樂山等三萬人者。具悉。卿蠻夷犯疆。方鎮致討。兇徒喪敗。荒徼清平。卿素蘊忠誠。又連封壤。疾旣同於山藪。勢益壯於輔車。想聞捷書。當倍慰愜。載省所賀。深見乃懷。

答段祐等賀冊皇太子禮畢表

朕祇膺統序。恭守典常。爰推至公。乃命長子。使主國鬯。用貞邦家。冊畢禮成。良增感慶。卿等各司軍衛。同奉表章。備見忠誠。益深嘉歎。所賀知。

答李詞賀處分王士則等德音表

朕臨馭天下。以懲勸爲先。有惡必誅。無功不念。顧承宗之罪。誠合討除。思武俊之勳。宜令嗣襲。况墳墓禁其翦伐。將校許以歸降。庶明用師。蓋非獲已。卿職修卿寺。誠奉本枝。省茲賀章。備見忠藎。

與吐蕃宰相鉢闌布勅書

勅吐蕃宰相沙門鉢闌布論與勃藏至省表及進奉具悉。卿器識通明。藻行精潔。以爲真實合性。忠信立誠。故能輔贊大蕃。叶和上國。弘清淨之教。思安邊陲。廣慈悲之心。令息兵甲。旣表卿之遠略。亦得國之良圖。况朕與彼蕃代爲甥舅。兩推誠信。共保始終。覽卿奏章。遠叶朕意。披閱嘉歎。至於再三。所議割還安樂秦原等三州事宜。已具前書。非不周細。及省來表。似未指明。將期事無後艱。必在言有先定。令信使往來。無壅疆場。彼此不侵。雖未申以會盟。亦足稱爲和好。必欲復修信誓。卽須重畫封疆。雖兩國盟約之言。積年未定。但三州口割之後。剋日可期。朕之衷情。卿之志願。俱在於此。豈不勉歟。又緣自議三州已來。此亦未發專使。今者贊普來意。欲以再審此言。故遣信臣。往諭誠意。卽不假別使。更到東軍。此使已後。應緣盟約之事。如其間節目未盡。更要商量。卿但與鳳翔節度使計會。此已處分。令其奏聞。則道路非遙。往來甚易。頗爲便近。亦冀速成。更待要約之言。皆已指定。封疆之事。保無改移。卽蕃漢俱遣重臣。然後各將成命。事關久遠。理貴分明。想卿通才。當稱朕意。曩者鄭叔矩路泌。因平涼盟會。沒落蕃中。比知叔矩已亡。路泌見在。念茲存沒。每用惻然。今旣約以通和。路泌合令歸國。叔矩骸骨亦合送還。表明信誠。兼亦在此。其論與勃藏等。尋到鳳翔。舊例未進表函。節度不敢聞奏。自取停滯。非此稽留。昨者方進表函。旋令召對。今便發遣。更不遲迴。仍令與祠部郎中兼御史中丞徐復及中使劉文燦等同往。其餘事宜。已具與贊普書內。

卿宜審於謀議。速副誠懷。兼有少信物賜卿。具如別錄。至宜領也。冬寒。卿比平安。好遣書指不多及。

與希朝詔

勅希朝。省所奏請。自部領當道兵馬一萬五千人。取蔚州路。越行營。并奏土門及承天軍。各添兵士備禦者。具悉。卿武毅雄才。忠貞大節。出爲良將。倚作信臣。約已徇公。忘身許國。忿違命不恭之寇。激勤王自効之心。親統銳師。率先羣帥。况又周知要害。備設防虞。計其威聲。已振兇醜。有臣如此。朕復何憂。佇建殊功。以副深望。所有動靜。宜數奏聞。想當知悉。

與師道詔

勅師道。未何至。省所奏當道。赴行營兵馬。取正月過渡河。逐便攻討。并奏兵馬出界後。請自供一月糧料。又奏待收下城邑。若有軍糧一月。已後續更支計。并陳謝慰問者。具悉。卿文武間生。忠貞特立。動有所効。知無不爲。昨獻帛助軍。極盈數於萬疋。今又賚糧出境。減經費於三旬。此乃力之所任。無不罄竭。慮之所及。無不經營。因時見憂國之心。臨事識忠臣之節。詔書慰諭。未盡朕懷。章疏謝陳。益嘉乃志。再三興歎。寤寐難忘。其所奏聞。並依來表。想宜知悉。

與劉濟詔

勅劉濟。李臯至。省表及露布。十二月十七日。劉鞬部領當道行營兵馬。收下饒陽縣城。破賊衆三千人。并擒斬將校。收獲馬畜器械等。兼送賊將朝履清等四人。又進所收饒陽縣等者。具悉。卿盡忠伐叛。發漁陽精銳之師。緄仗順臨戎。討冀方昏狂之寇。詔下而父子戮力。鼓行而將卒齊心。先羣帥以啓行。首諸軍而

告捷。連擒逆將。併下賊城。歸獻罪之俘囚。進已收之縣邑。可謂忘身徇國。盡禮事君。疾風知勁草之心。大雪見貞松之節。况表章之內。益歎恭勤。而眷想之間。如覩風彩。計茲兇醜。當已震驚。破竹之勢。可乘覆巢之期。非遠。佇清大慙。重副深懷。其饒陽縣卿宜且令鎮守。稍加存撫。用勸將來。宋常春卿所密奏具委事情。且宜叶和。以體朕意。故令宣慰。想當知悉。

祭吳少誠文

維元和五年歲次庚寅二月辛未朔二日壬申。皇帝遣內侍省內府局丞賜緋魚袋孫士政。以清酌庶羞之奠。致祭於故彰義軍節度使贈司徒吳少誠之靈。曰。惟爾武毅挺質。韜鈴奮身。負勇果之雄材。蓄變通之明識。自察廉列郡。節制成師。貞且有威。勤而不擾。軍戎輯睦。封域底寧。從義而致誠。仗順而保福。旣延寵渥。方茂輝榮。遽此幽淪。深用傷悼。逝波不捨。去日苦多。想松檟以軫懷。聞鼓鼙而興歎。恩加遣奠。禮舉褒崇。念爾有靈。知予此意。尙鑒。

與季安詔

勅季安。省所奏當道行營兵馬。今月十七日已收棗強縣。其賊棄城夜走者具悉。卿輸忠報國。嫉惡忘家。遣無敵之師。伐不襲之寇。軍聲遠屆。先路以風行。逆黨潛知。棄城而宵遁。已收縣邑。益振兵威。此皆卿訓練所加。指麾有素。永言明効。實屬深懷。固可乘勢應機。逐便進討。以卿忠盡。當副朕心。

與希朝詔

勅希朝。張嘉和至。省所奏前月二十六日破賊逆河湟鎮六千餘人具悉。卿親領銳師。誓誅逆黨。張軍心。

以吞敵。奮士力而指蹤。潛戒偏裨。先攻險阻。伐謀而事有成算。剋日而動不愆期。果敗兇徒。遂據要地。况殺傷既衆。收獲頗多。益壯軍威。可奪虜氣。佇聞掃蕩。以慰衷懷。

與從史詔

勅從史曹公。又至。省所奏。今月三日。柏鄉縣南。破賊衆約三萬人。并擒斬首級。收獲器械及馬等。又奏當軍所傷士馬數。并量事優卹事宜。悉卿外揚武略。內竭忠謀。率有名之師。深入其阻。遇無狀之寇。大挫其鋒。兵刃屢加。捷書頻至。殺傷數廣。績効居多。非卿悉力摧兇。誓心報國。則何能指麾之下。動必成功。表奏之間。事皆審實。既光重委。益副深懷。嘉歎再三。不忘寤寐。所奏承璫出軍合陣。并續發露布事宜。具委所陳。想當知悉。

與季安詔

勅季安。許峯至。省所奏具悉。卿勳親重德。台輔元臣。竭誠信以戴君。弘識度而體國。謀能極慮。言必盡忠。周覽表章。益增寤歎。吳少陽自參軍務。頗効恭勤。豈待奏陳。已有處分。想宜知悉。

與昭義軍將士詔

勅昭義軍節度下將士等。卿等當軍將士。與諸道不同。自經艱難。多易將帥。而忠順之節。未嘗有虧。朕每思之。無時暫忘。盧從史爲卿主將。作朕藩臣。權位尊崇。恩寵優厚。而乃外示恭順。內懷姦邪。刻削軍中。暴殄境內。朕以君臣之道。未忍發明。爲之含容。頗有年月。近又苟求起復。請討恆州。與賊通謀。爲國生患。自領士馬。久屯行營。收當軍賞設之資。加本道芻粟之估。不爲公用。盡入私家。此則主將之恩。於卿何有。臣

子之分。負朕寶深。卿等辯邪正之兩端。識逆順之大義。抱忠勇者恥居其下。守名節者憤發於中。失三軍之心。已聞大去。犯衆人之怒。果見不容。遠察事宜。備知賊款。興言嘉歎。至於再三。其當軍將士等賞設。已有處分。自上將校。下及士卒。各勵爾志。再思朕言。卿等承前已來。常保忠貞之節。自今以後。永爲心腹之軍。宜念始終。副茲矚望。故令宣慰。宜並悉之。夏熟。卿等各得平安。

與承璀詔

勅承璀。卿摠領禁軍。控臨戎境。見敵每張其勇敢。因事益表其忠勤。言念在懷。發於寤歎。昭義軍將士等去邪遠惡。仗義保忠。統其成師。宜得良帥。孟元陽夙懷武毅。累著功庸。威名甚彰。人望所屬。以之爲帥。必愜軍情。以之討賊。必有勳績。今授元陽檢校尚書右僕射。充昭義軍節度等使。未到行營間。其昭義軍卿宜切加宣撫。務使安寧。烏重胤職在偏裨。保於忠正。宜從獎擢。以表殊恩。今授烏重胤河陽節度使。兼御史大夫。卿亦宜諭此恩意。令知朕心。兼恐河陽無人。速宜進發。想當知悉。

與元陽詔

勅元陽。澤潞全軍方討恆冀。盧從史虧失大節。包藏二心。茲迹邪謀。日已自露。軍情物議。俱所不容。尋追赴朝。今已在道。朕以昭義將士忠順成風。况在行營。久勤戎事。今欲使其戰者奮發。居者悅安。共成大功。必在良帥。以卿有澗水之勳。効有河陽之政。令思之甚熱。無以易卿。宜領重藩。仍遷崇秩。今授卿檢校尚書右僕射。充澤潞節度等使。并賜旌節。告身等往。卿宜速發。先到潞府。上訖。便赴行營。慰安軍心。宜諭朕意。烏重胤徇忠守節。宜加獎用。今便授重胤河陽節度使。兼御史大夫。想宜知悉。

與詔義軍將士勅書

勅詔義軍節度下將士等。卿等久在行營。乍無主將。而士旅輯睦。軍壘安寧。足彰守正之心。尤見盡忠之節。以此歎矚。勞於寢興。孟元陽是朕信臣。爲國良將。威略可以懾兇孽。慈和可以牧師人。累著忠勤。克諧朕命。爲其主帥。必副羣情。況卿等同嫉姦邪。久困貪暴。宜以仁賢之帥。撫卿忠義之軍。靖思元陽。無出其右。令授元陽檢校尚書右僕射。充卿等當道節度使。勉同王事。以慰朕懷。烏重胤特効忠誠。深宜獎擢。今便授河陽節度使。兼御史大夫。故令宣慰。並宜知悉。

與師道詔

勅師道。林英至。省所陳奏。并進王承宗與卿書者。具悉。王承宗童騃無知。兇器有素。雖藉祖父之寵。曾微分寸之勞。但以武俊勳。冊書姻連。戚屬朕獨排羣議。特降殊私。未卒父喪。使承祖業。卽加新命。仍撫舊封。則朕於承宗。恩亦至矣。而僞陳誠款。欺誑使臣。假託軍情。拒違詔命。則承宗於朕。罪莫大焉。悖禮亂心。暴於天下。此乃承宗干國家之紀。非朕忘武俊之功。遂至用師。蓋非獲已。仍開生路。許以自新。而梟首不悛。鴟張益熾。人情共棄。國典不容。在於朕心。安敢輕捨。卿旣膺注意。義感酬恩。所獻表章。具已詳覽。慮深遠計。詞切讜言。在忠謀而則然。於事體而未可。誠嘉勤至。難允懇懷。今諸道將帥。親領士馬。深入寇境。頻奏捷書。四面合圍。一心旅進。窮迫已甚。覆滅非遙。况卿同遣師徒。已收縣邑。冀清氛孽。佇見功名。勉於令圖。副此矚望。

與師道詔

勅師道。任文質至。省表具悉。盧從史頃者請率全師。誓清妖孽。朕推誠待物。許之不疑。而背恩於上。結怨於下。邪謀貳志。日以彰聞。虧大節而自絕於君。積羣怒而不容於衆。因以邀命。幸而脫身。屈法申恩。已有處分。昨者詔旨已明示卿。卿體爲國心。事君盡力。固宜有聞必薦。有見必陳。竭其忠諒之誠。濟其獻替之美。省閱章奏。嘉歎良多。

與茂昭書

勅茂昭。王日興至。省所奏。今月十八日。大破賊衆一萬七千人。并擒斬收獲。訖者具悉。卿親率勁兵。誓平妖寇。竭股肱之力。中有奇謀。勵父子之軍。前無強敵。故能深入賊境。大破兇徒。殺傷既多。俘獲亦廣。具詳奏報。備見忠勞。眷矚之懷。發於寤歎。將士等各懷勇烈。同忿寇讎。激於衆心。致此殊効。況荷戈於炎暑之際。奮身於鋒刃之間。永念於茲。未嘗暫忘。故令宣慰。宜並悉之。

與昭義節度親事將士等書

勅昭義軍節度下親事將士等。盧從史受恩至重。負國至多。衆所不容。追令赴闕。朕以誤曾任使。貴全始終。今則止於貶官。此蓋曲從寬典。卿等抱忠懷義。朕所素知。頃以詣營同事。從史三軍一體。俱是王臣。既不相干。又能自効。朕方優賞。以酬功勳。何至不安。有此疑懼。必恐從史已追之後。元陽未到之間。卿等當營。乍無將主。或被外人扇誘。令衆意憂疑。勢使之然。事非獲已。朕雖在此。遠有軍情。料卿本心。必無此意。况元陽勤儉。恤下寬厚。愛人久在河陽。甚近澤潞。元陽臧否。卿等合諧。以卿忠義之軍。故擇仁賢爲帥。已有詔示。宜諭元陽。若到行營。一無所問。乃至將士家口。亦令優卹安存。卿復何憂。必得其所。况昭義將士。

艱難已來。保守忠貞。未嘗虧失。天下稱歎。卿亦自知。又卿父母妻兒。家田墳墓。一物以上。並在潞州。頃刻之間。豈忍便棄。朕之此語。卿宜細思。各相勉諭。同保忠順。計元陽已合到彼。卿等便聽元陽指麾。想卿等心。必副朕意。故令宣慰。宜並悉知。

與執恭詔

勅執恭。王克謹至。省所奏。今月八日。進收乎昌縣。已令鎮守。并奏劉濟欲與卿約義事者。具悉。卿奉辭伐罪。仗節啓行。指顧偏裨。收復城邑。已令鎮備。兼務緝綏。威惠之方。旣明。弔伐之義。斯在。永言倚任。彌注衷情。劉濟將相大臣。與卿先父同列。欲求契約。固合允從。豈唯繼好私情。亦是叶心王事。載省來奏。深鑒乃誠。至於寢興不忘。嘉爾。

與恆州節度下將士書

勅成德軍節度下將士等。朕以王者之道。與物無私。若違命執迷。則罔有容捨。若知非改悔。則無不含弘。不窮無告之人。不塞自新之路。頃屬姦臣。從史謀構異端。致使恆陽。隔於恩外。六郡之地。皆廢農桑。三軍之人。並懼鋒鏑。每一念至。中心惘然。今卿等繼獻表章。遠輸誠款。省承宗之勤懇。難阻其情。思武俊之功勞。不能無念。況事因詿誤。而理可哀矜。今已降制書。各從洗雪。承宗仍復舊官爵。充恆冀深趙德棣六州觀察使。成德軍節度使。將士等官爵實封。並宜仍舊待之。如初。卿等各宜叶力同心。知恩感德。共保終始。稱朕意焉。故令宣慰。宜並知悉。

與承宗詔

勅承宗頃者。盧從史包藏姦詐。矯示公忠。下誣物情。上惑朝聽。使卿陷於違命。使朕至於用兵。交亂君臣。罪有所在。今從史已正刑典。遠棄驩州。構亂者既就屏除。誘陷者自宜明白。况卿代連姻戚。朕豈不思。祖有功勞。朕豈不念。事不得已。勢至如斯。棄絕已來。常懷憫惻。卿今既陳章疏。懇獻衷誠。請進官員。願修貢賦。誓心以納款。歸罪而責躬。情可哀憐。法存開釋。朕託於人上。及茲六載。體天地含弘之德。厚君臣終始之恩。常以人安爲心。豈欲物失其所。今所以開獨見之路。降非常之恩。卿及將士等。具已制書。並從洗滌。卿仍復舊官爵。便充恆冀。深趙德棣等州節度。觀察等使。并賜旌節。告身等往。爵土仍舊。君臣如初。想卿中懷。當自知感。所宜追補前悔。勉勉後圖。夙夜思之。永副朕意。想當知悉。

批宰相賀赦王承宗表

先臣武俊功不可忘。後嗣承宗過而能改。朕所以捨其罪悔。議以勳親。垂宥過之恩。尙宜及爾十代。引泣辜之貴。誠合在予一人。與其黷武而取威。不苦匿瑕而務德。卿等重居台輔。密贊謀猶。發於衷誠。有此稱賀。省閱章奏。嘉歎久之。

與劉濟詔

勅劉濟省所謝男紹及孫景震等授官。并謝賜器仗弓甲刀斧等者。具悉。卿文武全才。將相重任。本於忠諒。成此勳勞。尙德尊賢。位已極於台輔。念功懋賞。寵宜及於子孫。時論允歸。朝章斯舉。至於出茲戎器。賜我元臣。但可以申朕恩私。未足以表卿功績。載覽來表。備見乃誠。併此謝陳。益嘉勤盡。

代王伋答吐蕃北道節度論贊勃藏書

大唐朔方靈鹽豐等州節度使檢校戶部尚書寧塞郡王王佖致書大蕃河西北道節度使論公廳下。遠辱來書兼蒙厚貺。慰悚之至。難述所懷。國家與彼蕃代爲舅甥。日洽恩信。雖云兩國。實若一家。遂令疆場之臣。得以書信相問。况麾下以公忠之節。雄勇之才。翊佐大邦。經略北道。倂近蒙制命。守在邊陲。慰望之情。一二難盡。皇帝以贊普頻遣和使。懇求通好。凡此邊鎮。皆奉朝章。但令慎守封陲。不許輒令侵軼。至於事理。彼此宜然。且如党項久居漢界。曾無征稅。旣感恩德。未嘗動搖。然雖懷此撫循。亦聞闕彼財貨。亡命而去。獲利而歸。但恐彼蕃不知。大爲党項所賣。其中亦聞誘致。事甚分明。不能縷陳。計已深悉。今請去而勿誘。來而勿容。不失兩境之歡。不傷二國之好。在此誠爲小事。於彼卽是遠謀。幸履坦途。勿遵邪徑。今聖上德柔四海。威及萬方。雖外國蠻夷。尙皆率伏。况中華臣妾。敢有不恭。豈假彼蕃。欲相借助。誠愧厚意。終訝過言。承去年出師。討逐迴紇。其間勝負。此亦備知。不勞來書。遠相示及。所蒙寄贈。並已檢到。倂爲邊將。須守常規。馬及胡瓶。依命已受。其迴紇生口。緣比無此列。未奉進止。不敢便留。今却分付來人。至彼望垂檢領。有少答信。具如別數。幸恕寡薄也。初秋尙熱。惟所履珍。和謹因譯語官馬。屈林恭迴。不具。倂白。

與吉甫詔

勅吉甫。韓用政至。省所奏陳。謝具悉。卿忠貞立身。文武爲德。志惟經國。謀不忘君。才可以雄鎮方隅。故委之外關。智可以密參帷幄。故任以中樞。而能一其衷心。再有冲讓。雖勞謙彌切。每陳丹府之誠。而憂寄方深。難輟紫垣之務。勉諭已伸於前詔。忠勤載露於來章。今征討已停。方隅稍泰。克清之日。雖則不遙。難奪之心。亦宜且抑。重此宣慰。當體朕懷。是推至公。煩有陳謝。

與吐蕃宰相尙綺心兒等書

勅吐蕃宰相尙綺心兒等。論思諾悉至。省表并進奉具悉。卿等才器特茂。識略甚明。仗義立身。資忠事主。一上佐贊。下康黎元。以尋盟納款爲謀。繼好息人爲請。是卿上策。吐朕中心。每覽表章。輒用嘉歎。朕與彼蕃國代爲舅甥。日結恩信。自論盟會。頗歷歲時。常欲速成。以爲永好。雖誠明之內。彼此無疑。而言約之間。往復未盡。今故略收來意。重示所懷。想卿通明。當所鑒悉。河隴之地。國家舊封。論州郡。則其數頗多。計年歲。則沿來甚近。既通和好。悉合歸還。今者捨而不言。豈是無心愛惜。但務早成盟約。所以唯言三州。則沒於彼者甚多。歸於此者至少。猶合推於禮讓。豈假形於言詞。來表云。此三州非創侵襲。不可割屬。大唐來且此本不屬蕃。豈非侵襲所得。今是却歸舊管。何引割屬爲詞。去年與論勃藏來。卽云覆取進旨。贊普便請爲定。今兩般使至。又云比之小務。未合首而論之。前後既有異同。信使徒煩來去。雖欲速爲盟會。其如無所適從。靜言二三。固不在此。若論和好。卽今各無侵軼。已同一家。若議修盟。卽須重定封疆。先還三郡。若三郡未復。兩界未分。卽是未定封疆。憑何以爲要約。彼若吝惜小事。輕易遠圖。未能修盟。且務通好。至於信使一往一來。但令疎數得中。足表情意不絕。彼有要事。卽令使來。此有要事。亦令使往。若封境之上。小小事。意但令邊頭節度兩處計會商量。則勞費之間。彼此省便。前般蕃使論悉吉贊至。緣盟約事。大須審商量。未及發遣。後使雖是兩般。所論只緣一事。故令相待。今遣同歸。在於日時。亦未淹久。所送鄭叔矩及路泌神柩及男女等。並已到。此良用惻然。厚贈遠歸。深嘉來意。其劉成師元非劉闢子姪。本是成都郡人。已令送還本貫。其餘事目。並在贊普書中。卿等宜審參量。以副朕意。使迴之日。可備奏聞。今遣兼御史

中丞李銛及中使與迺使同往。各有少信物。具如別數。至宜領之。秋涼。卿等各得平安好。遣書指不多及。
答王承宗謝洗雪及復官爵表

帝者之道。蕩然無私。唯推赤心。以牧黔首。故一夫不獲。若納之於隍。一物歸誠。則容之如地。況卿家聯懿戚。寵自先朝。祖立茂功。賞延後嗣。因人誑誤。不染疵瑕。滌以恩波。煦之寵澤。撫舊封而察廉六郡。進新律而統制三軍。蕩穢加恩。何以過此。及覩來表。乃見深誠。言必由衷。事皆知感。承家襲慶。誓繼力於前修。補過酬恩。願指期於後効。永言爾志。甚叶朕懷。勉思始終。用副眷矚。所謝知。

與鄭綱詔

勅鄭綱。省所奏。邕管黃少卿及子弟等事宜。具悉。卿望重中朝。寄深南服。誓敷惠政。行化遠人。言念忠勤。不忘監牯。山洞夷落。易擾難安。比來撫之未及其道。覽卿所奏。頗合其宜。歲時之間。當革前弊。勉於招諭。以副朕心。

答高郢請致仕第二表

卿有忠貞之節。立於險中。有清重之名。鎮於朝右。而能始終有道。進退有常。援禮引年。遺榮致政。人鮮知止。卿獨能行。不唯振起古風。亦足激揚時俗。於卿則確然難奪。在朕則情豈易忘。誠鑒乃懷。未允來表。

與劉總詔

勅劉總。卿業繼將門。才兼武略。累臨軍郡。悉著良能。襲以弓裘。宜知旌鉞。仍舉奪情之典。以昭延賞之恩。今授卿起復雲麾將軍。檢校工部尚書。充范陽節度等使。并賜旌節。官告往。想宜知悉。

答裴垪讓中書侍郎平章事表

卿自登台輔。每竭忠貞。一身秉彝。百度惟序。致君盡力。久積股肱之勤。憂國勞心。微生腠理之疾。暫從休告。遽獻表章。所陳雖是。卿心所請。殊非朕意。宜加調攝。速就平和。以副虛懷。無爲固讓。

答劉總謝檢校工部尚書范陽節度使表

卿幼承義訓。長有令聞。能遵忠孝之風。不墜弓裘之業。朕所以命加異等。寵冠常倫。特授雙旌。超登八座。豈唯延賞。亦在任能。將懋前修。勉申後効。載省章疏。深鑒誠懷。所謝知。

與茂昭詔

勅茂昭。王日興至。省表陳讓。檢校太尉者具悉。卿文武大僚。勳戚重望。累展朝宗之禮。足表恭敬之心。况多戰伐立功。彌彰勤盡。言念及此。每用嘉焉。宜加寵榮。已降新命。何至謙讓。仍辭舊官。眷倚之懷。並具前詔。想宜知悉。

答任迪簡讓易定節度使表

卿修文立身。經武致用。每誓心於忠勇。常濟事以智謀。自副戎車。已屬時望。及分旌鉞。果愜軍情。况武義之師。輸忠仗順。所期慰撫。以就輯寧。何至撝謙。有茲陳讓。所進官告。今却賜卿。宜體朕懷。卽斷來表。

答裴垪讓宰相第三表

卿疾病已來。表疏相繼。雖辭乞之誠。頗切。而注望之意。方深。所以來章。久而未報。然念卿勤懇之請。至於再三。若心不甚安。卽疾難速愈。是用輟樞劇之務。加崇重之官。稍遂優閑。佇期痊復。勉從爾志。深抑予懷。

答裴垺謝銀青光祿大夫兵部尙書表

卿自居鈞軸。日獻謀猷。戴君常竭其股肱。憂國每形於顏色。及嬰疾病。益不遑安。未踰四旬。以至三讓。搆謙乘易退之道。堅懇陳難奪之詞。遂抑朕心。俯從卿請。而七命印綬。五兵尙書官秩甚崇。事務稍簡。就以優養。冀乎和平。載省表章。深見誠意。

與劉總詔

勅劉總。康志安至。省所謝陳具悉。卿之先父。爲朕元臣。大節殊功。歿而不朽。宜加恩禮。俾洽哀榮。故命宰臣爲之撰錄。卿義深報國。孝重承家。旣感顯親之恩。願竭戴君之節。遠有奏謝。益用嘉之。想宜知悉。

與房式詔

勅房式。卿以良才。尹茲東洛。公忠無怠。聲績有聞。嘉歎之深。寧忘寤寐。宣城重寄。深在得人。藉卿政能。往就綏撫。今授卿宣州刺史。兼御史中丞。充宣歙等州都團練觀察處署等使。并賜告身往。卿宜便起赴本道。勉修所任。以稱朕懷。想當知悉。

與盧恆卿詔

勅盧恆卿。累登朝序。皆著公方。自領藩條。益彰理行。恪恭而奉上。勤儉以牧人。不加寵榮。何勸來者。朕以擢管漕運。軍國所資。其務甚殷。所寄尤重。以卿有忠勞之前効。幹濟之長才。常簡朕心。宜授此職。今除卿尙書刑部侍郎。充諸道鹽鐵轉運使。并賜告身往。宜卽赴闕庭。想當知悉。

與新羅王金重熙等書

勅新羅王金重熙。金獻章及僧冲虛等。至省表。兼進獻。及進功德。并陳謝者具悉。卿一方貴族。累葉雄才。杖忠孝以立身。資信義而爲國。代承爵命。日慕華風。師旅叶和。邊疆寧泰。况又時修職貢。歲奉表章。進獻精珍。忠勤並至。功德成就。恭敬彌彰。載覽謝陳。益用嘉歎。滄波萬里。雖隔於海東。丹慊一心。每馳於闕下。以茲嘉尚。常屬寢興。勉弘始終。用副朕意。今遣金獻章等歸國。并有少信物。具如別錄。卿母及妃。并副王宰相已下。各有賜物。至宜領之。冬寒。卿比平安好。卿母比得和宜。官吏僧道將士百姓等各加存問。遺書指不多及。

答文武百寮嚴綬等賀御製新譯大乘本生心地觀經序表

朕勤求道本。廣挹教源。以真如不二之宗。助清淨得一之化。况斯經典。時爲大乘。名理精微。翻譯成就。雖契心則。離於文字。而得意亦假於筌蹄。庶使發揮。因爲述序。卿等精通外學。懇竭忠誠。引經贊揚。奉表稱賀。再三省覽。嘉歎久之。

答孟簡蕭俛等賀御製新譯大乘本生心地觀經序狀

大仙經典。最上法乘。來自西方。闕於中禁。將期利益。必在闡揚。遂命僧徒。譯其句偈。兼詔卿等。潤以文言。昨因披尋。深得真諦。悟本生不滅之義。證心地無相之宗。方勤護持。聊著序引。永言述作。猶愧聖明。卿等賀陳。良深嘉尚。

答元應授岳鄂觀察使謝上表

夏口重鎮。屬在時賢。非明肅不能理其軍。非簡儉不能阜其俗。以卿有仁厚之質。審直之風。累踐班行。皆

著名節。遂輟中憲。往臨外藩。知已下車。深慰人望。佇茲報政。用副朕懷。所謝知。

答李鄴授淮南節度使謝上表

卿抱兼人之才。秉徇公之節。每登要職。悉著能名。若刃發硃。投而不滯。如玉在佩。動必有聲。朕以距淮而南。人物繁會。非廉明何以貞師。察俗非簡惠何以通商。綏農前勞。旣彰。後効何遠。載省來表。知已下車。勉副虛懷。佇觀新政。所謝知。

畫大羅天尊贊 并序

歲正月十九日。順宗仙駕上昇之月日也。皇帝嗣位六載。每及茲晨。齋居孝思。明發不寐。以爲玄祖之教。本乎道。先帝之神在乎天。故畫大羅天尊像者。欲以最上勝因。而成本功德也。然則知之者不如念之者。念之者不如仰之者。是用諦念真力。虔仰尊儀。命設色之工。圖其儀形。命掌文之臣。讚其功德。達孝誠於天上。致孝理於域中。斯蓋弘願發於我皇。景福薦於先后。稽首奉詔。跪稱贊云。

維大羅兮天上天。 維天尊兮仙上仙。 高真之鑒照下界。 孝敬之心達上玄。
每一念兮以一仰。 感罔極兮福無壘。

卷四十

答元義請上尊號表

朕自君臨。運逢休泰。時歲豐稔。兇醜殄夷。此皆宗社降靈。忠賢宣力。願惟寡德。敢受鴻名。卿中發懇誠。上

尊美號。雖屬人望。難貪天功。宜悉所懷。勿固爲請。

答薛萃賀生擒李錡表

朕自嗣耿光。每多惕厲。念必先於除害。志無忘於安人。李錡大負國恩。自貽天罰。師徒未動於疆場。父子俱肆於市朝。信上天之禍淫。與率土而同慶。省視來表。深鑒乃誠。所賀知。

與薛萃詔

勅薛萃。楊君靖至。省所陳謝具悉。卿勤王之節。徇公滅私。事主之誠。移忠資孝。苟非褒贈。何以顯揚。且清白之風。既自家而刑國。則寵旌之澤。宜因葉以流根。式遵追遠之經。用表敬忠之訓。是爲禮典。煩至謝章。

與嚴礪詔

勅嚴礪。薛光朝至。所陳謝具悉。卿徇公竭誠。臣節克著。揚名濟美。子道有光。敬忠既本於義方。追遠宜崇於禮命。俾優褒贈。爰慰孝思。秩貴冬官。以表過庭之訓。封榮石窹。用旌徙宅之賢。雖亦新恩。允符舊典。遠煩陳謝。深見懇誠。

與餘慶詔

勅餘慶。省所謝陳具悉。卿累居衰職。時謂盡忠。自尹洛師。日聞報政。臣節旣彰於宣力。子道莫大於揚名。俾光孝思。爰舉禮命。榮褒冢宰。寵賁幽靈。式是彝章。豈爲私渥。有煩陳謝。深見誠懷。

答杜黃裳請上尊號表

朕以薄德。嗣守不圖。不敢荒寧。以弘理道。幸屬歲時豐稔。兇寇梟夷。風雨不愆。禮圓丘而報本。雷霆未震。

疊大社而服刑。斯皆十聖降靈。幽贊寡昧。百辟叶德。馴致和平。永惟弘名。實懼虛美。卿上稽祖訓。下酌羣情。陳獻表章。請加徽號。泊於王公卿士。降及耆艾。緇黃咸一。乃心各三。其請朕嘗以宰元化於曲成者。物法天道者。從欲於人。雖恤隱泣辜。未臻三五之化。而樂推欣戴。難遠億兆之心。德非稱焉。讓不獲已。勉從所請。深愧於懷。

與從史詔

勅從史楊幹至。省所奏。今月七日到潞城縣。降雪尺餘。兼奏耆老等詣闕請欲立碑。并手疏通和劉濟本末事宜者。具悉。卿分朕之憂。求人之瘼。時降大雪。豐年表祥。豈惟澤及土田。將使物無疵厲。休慶斯在。慰望良深。耆老等遠詣闕庭。請立碑紀。尋已允許。當體誠懷。以旌政能。無至陳讓。知卿協比其鄰。翼戴爲意。陳此手疏。發於血誠。忠懇彌彰。嘉歎不已。永言臣節。何日忘之。想宜知悉。

與韓臯詔

勅韓臯。省所陳賀具悉。卿朕自守睿圖。每思寬政。慮先禁暴。念在措刑。李錡負國反常。阻兵干紀。未勞師旅。已就誅夷。卿宜力納忠。秉心嫉惡。遠陳慶賀。深見懇誠。想宜知悉。

與元衡詔

勅元衡。卿立身許國。竭力匡君。人之具瞻。予所嘉賴。凋殘是卹。遠藉宣風之能。利澤所資。暫輟爲霖之用。茲和旣敷於兵後。惠信當洽於言前。永念忠勤。豈忘竊想。計卿行邁。已到西川。涉遠冒寒。固甚勞頓。勉加綏撫。以副朕懷。想宜知悉。

答李扞等謝許上尊號表

朕自臨萬邦。僅經三載。位雖託於人上。化未洽於域中。永念眇身。敢當大號。卿等義深宗室。忠盡君親。一其情誠。三有陳獻。迫以人望。厭於天心。遂抑所懷。勉從其請。固辭而事非獲已。撫德而何以堪之。再省謝章。彌增惕厲。

答馮伉請上尊號表

朕統承大寶。時屬小康。伐謀而吳蜀克清。示信而華夷有截。斯皆宗社垂祐。天地降和。非予冲人。所能馴致。卿上稽十聖之訓。下酌萬人之心。以爲不讓強名。未傷於體道。屈已徇物。何爽於至公。遂抑素懷。俯從衆望。雖鴻名未稱。每勞踏地之心。而人欲下從。卽爽法天之德。勉依勸請。良用愧懷。

答長安萬年兩縣百姓耆壽等謝許上尊號表

朕每念邕熙。慙未及於億兆。永言徽號。讓已至於再三。而文武具寮。淄黃庶老。懇陳誠款。明引訓謨。開子以天地無私之心。起予以聖宗不易之訓。以大道者無求於物。物尊而不辭。至公者非欲其名。名立而不讓。迫於固然之理。不得已而許之。卿等誠至感通。義深欣戴。再煩陳謝。益用愧懷。

答元素謝上表

卿用兼文武。識合變通。輟綱領於中朝。授麾幢於外闕。吏能足以惠物。將略足以董戎。人望所歸。予心是賴。知卿已到本鎮。當慰疲人。深藉撫綏之方。以安凋弊之俗。日期報政。歲望成功。勉勤所圖。用副朕意。

答韓臯請上尊號表

銷滲致和。幸逢昌運。加名建號。豈稱眇身。而文武具寮。黎獻庶老。引古今之明訓。陳億兆之懇誠。謂德有所歸。謳歌不可以苟讓。謂功有所獻。徽號不可以固辭。遂抑中懷。俯從衆望。庶增修乎茂實。冀克副於鴻名。卿發誠自中。歸美於上。勉依所謂。彌愧於心。

答馮伉謝許上尊號表

朕以眇身。嗣於丕業。心雖勞於惕厲。化未及於邕熙。永惟強名。實懼虛美。上自一二元老。下及億兆黎人。大洽詢謀。明徵典訓。增予以巍巍之號。感予以顛顛之誠。既迫所懷。俯從其請。卿義深奉上。志切戴君。再省謝陳。彌增愧惕。

與顏証詔

勅顏証。戴岷至。省所賀及謝。王國清充五嶺監軍具悉。卿職在撫綏。任兼備禦。公勤夙著。聞望日彰。言念於懷。豈忘寤寐。乾象昭感。壽星垂文。與時相膺。有道則見。顧慚菲德。何以當之。卿戎旅事殷。宜有監領。蓋爲常例。煩至謝陳。想宜知悉。

與從史詔

勅從史。省所陳謝。追贈亡母。并舉薦。韋悅具悉。卿推誠奉國。積慶承家。既彰盡節之忠。宜洽流根之澤。雖祿難逮。養已闕。靈於九原。而孝在顯親。宜旌賢於三徙。俾崇封贈。以極哀榮。韋悅既有才能。又所諳悉。卿即發遣。令赴闕庭。卿之忠誠。朕所識察。豈待陳露。然後知之。載覽來章。益嘉懇切。想宜知悉。

與季安詔

勅季安省所陳請具悉。卿朕纂承鴻業，司牧蒼生，僅致小康，未臻大化，實慚薄德，未稱崇名，而華夷兆人，內外羣名，屢有勤請，難於因違，卿遠獻表章，明徵典訓，納忠於上，歸美於君，勉從懇誠，良用愧惕。儲貳者，上繼宗祖，下貞邦家，心豈暫忘，事或未暇，尚阻來請，當體所懷。

詔高固贈

勅高固，卿奉國戴君，必竭忠節，統戎護塞，克著勳勞，自領藩垣，委之心膺，忠愍之志，久而益彰，欽歎在懷，何嘗暫忘。以卿一從軍旅，多在邊陲，歲月積深，勤勞滋久，所宜出入中外，周旋寵光，今授卿檢校尚書右僕射御史大夫，兼右羽林軍統軍，以端揆之崇，兼環衛之帥，遂卿望闕之戀，表朕念功之心，仍賜卿官告，卿宜卽赴闕庭，想宜知悉。

祭故贈婕妤孟氏文

維元和二年歲次丁亥十二月甲寅朔十九日壬申，皇帝遣某官某以庶羞之奠，致祭於故婕妤之靈。自惟爾和順積中，柔明奉上，動靜合肅邕之體，進退得婉孌之儀，選自良家，備茲內職，修令顏以碩德，蘭幽有香，守明節而保身，玉潔無玷，方資懿範，以茂嘉猷，彼美有聞，於何不淑，遽茲淪逝，深用惻傷，旣卜日辰，爰申奠醑，以爾有班氏之明智，故贈以婕妤，以爾有宓妃之淑容，故葬於洛浦，魂兮不昧，歆此誠獻，尚饗。

季冬薦獻太清宮詞文

維元和二年歲次丁亥十二月甲寅朔二十六日己卯，嗣皇帝臣稽首大聖祖高上大道金闕玄元天皇大帝，伏以今年司天臺奏正月三日祀上帝於南郊，佳氣充塞，四方溫潤，祥風微起，廬州申連理樹一株。

彰義軍節度使進白鳥一。鄭滑觀察使奏瑞麥五科。司天臺奏六月五日夜鎮星見。河陽節度使進白雀一。荆南節度使申運理樹一本。山南西道觀察使申嘉瓜一枚。司天臺奏六月十三日夜老人星見。河南府申芝草兩莖。司天臺奏冬至日佳氣充塞。瑞雪祁寒者。臣嗣丞不圖。肅恭寅畏。祖宗垂慶。嘉瑞薦臻。虔奉禎祥。伏深祗惕。今時惟玄律。節及季冬。仰薦明誠。敬率恆典。謹遣攝太尉司徒平章事杜佑薦獻以聞。謹詞。

與茂昭詔

勅茂昭。盧校至。省所奏請上尊號及建儲闈。賀誅李錡。并進馬者。具悉。卿朕以寡德。祇嗣丕圖。雖致小康。豈稱大號。迫於人望。遂抑予懷。永惟強名。實愧虛受。儲貳者。上繼宗祖。下貞邦家。心非暫忘。事或未暇。尚阻來請。宜體所懷。李錡包藏亂心。奮發兇德。不勞征討。自就誅夷。想卿忠誠。倍以爲慰。所進馬訓。良可尙服。御且閑。取其戀主之心。足表爲臣之節。再三省覽。嘉歎久之。想當知悉。

答百寮謝許追遊集宴表

在昔哲王。居於人上。推其憂樂。與衆共之。須臾三兇薦興。二載連獲。凡百有位。咸一其心。誠念嘉謀。共致昭泰。今四表無事。三農有年。思與羣情。同其具慶。是宜削苛察之前弊。煦寬裕之新恩。仁及下而啓迪。歡心澤先春而導迎和氣。昨逢多故。主憂且使臣勞。今致小康。上安則宜下樂。庶欲解人之懼。粗伸推己之恩。豈曰殊私。煩於陳謝。

答李扞謝許遊宴表

朕自御萬方。僅經三載。運逢休泰。俗漸和平。當朝野無虞之時。見君臣相遇之樂。是故去滋彰之化。弘優貸之恩。近自宗親。下及士庶。賜其宴衍。遂以優遊。蓋以己之所安。思與人之共樂。雖夕惕而若厲。每戎志於無荒。賜春遊以發生。宜助時而有慶。卿等榮崇宗寺。恩重本枝。省所謝陳。彌嘉誠懇。

答劉濟詔

勅劉濟。省所奏茂昭送卿管內百姓般進能等七人奏前後事由具悉。卿爲國大臣。與君同體。寬而得衆。忠以忘身。每徇公而滅私。能虛懷以容物。與茂昭疆場之事。小有違言。曲直是非。朕已明辯。卿外崇藩翰。內贊謨猷。念屈己以爲心。或難容忍。思戴君而是力。宜務叶和。勉卿寬裕之懷。助朕含弘之化。想宜知悉。

與柳晟詔

勅柳晟。卜英琦至。省所奏慶雲并進圖者具悉。昌運將開。祥符先見。發自和氣。聚爲卿雲。捧日而五色相宣。垂天而萬物咸覩。斯爲嘉瑞。宜契升平。朕方致小康。未臻大化。受茲玄貺。祇惕良深。卿以誠事君。推美奉上。獻輪困於圖畫。陳懇款於表章。披閱再三。彌增嘉歎。

答薛萃謝授浙東觀察使表

卿久踐吏途。累聞能政。及居藩鎮。尤見忠勤。訓導而羣黎向方。廉察而列郡承式。實嘉乃績。每簡予心。宜遷雄劇之藩。以廣循良之化。勉於爲理。副朕所懷。所謝知。

上元日歎道文

道本無象。功成強名。生一氣之先。爲萬物之母。吹煦寒暑。陰陽節而歲功成。輔相乾坤。上下交而生物遂。

故能阜蕃動植。啓迪邕熙。邦家保安。夷夏咸若。今以時殷獻歲。節及上元。女道士某等奉爲皇帝焚香行道。敬修功德。伏願聲聞紫極。不降玄休。大庇羣生。永康四海。流光垂慶。億萬斯年。

畫大羅天尊讚文

道用無窮。統之者大聖。神化不測。感之者至誠。非圖像無以示儀形。非供養無以展嚴敬。故一念一禮。而福隨之。畫大羅天尊者。奉爲順宗至德大聖大孝皇帝忌辰之所造也。皇帝祖玄元之風。嗣清淨之理。志在善繼。心惟孝思。申命工人。彰施繪事。粹容儼若。真相炳焉。憑志誠而上通。垂景福而下濟。詞臣奉詔。恭爲讚云。

眞通之象。孝感之心。率土瞻仰。在天照臨。蓄爲精誠。發爲圖畫。如從大羅。應念而下。

答朱仕明賀冊尊號及恩赦表

朕以寡德。嗣承睿圖。俯從衆誠。勉受鴻稱。慶之大者。豈在予一人。推而廣之。宜及爾萬姓。爰因受冊之禮。遂施作解之恩。俾與羣生。同斯大慶。卿盡忠訓旅。推美奉君。省茲賀陳。深見誠至。

祭咸安公主文

維元和三年歲次戊子三月癸未某日。皇帝遣某官某以庶羞之奠。致祭於故咸安大長公主親澹毗伽可敦之靈。曰。惟姑柔明立性。溫惠保身。靜修德容。動中規度。組紉之訓。既習於公宮。湯沐之封。遂開於國邑。及禮從出降。義重和親。承渥澤於三朝。播芳猷於九姓。遠修好信。既申協比之姻。殊俗保和。實賴肅雍之德。方憑福履。以茂輝榮。宜降永年。遽歸長夜。悲深訃告。寵極哀榮。爰命使臣。往申奠禮。故鄉不返。烏孫

之曲空傳。歸路雖遙。青塚之魂可復。遠陳薄醑。庶鑑悲懷。嗚呼尙饗。

與仕明詔

卿久鎮邊防。初膺闕寄。式旌勤効。俾洽恩榮。褒德念功。故進封以示寵。忠誠亮節。宜因實而錫名。既表新恩。亦惟舊典。今改封卿丹陽郡王。仍改名忠亮。勉勤乃事。以副所懷。想宜知悉。

與崇文詔

勅崇文段良玘。至省所謝亡妻邑號具悉。卿有濟時之勳。寵居袞職。士政承積善之慶。列在王官。俾洽恩光。故加褒贈。念梧桐之早落。不及夫榮。追芣苢之遺芳。宜從子貴。式崇寵命。以賁幽靈。省茲謝章。良用嘉歎。

祭張敬則文

維元和三年歲次戊子七月辛巳朔二十七日丁未。皇帝遣某官某。以清酌之奠。致祭於故鳳翔節度使贈某官張敬則之靈。惟爾挺武毅之質。負將帥之才。名以忠聞。位由勤致。自膺闕職。益茂勳猷。惠葺疲氓。威吞黠虜。一方膏雨。千里長城。繼博望之功勞。能恢代業。傳子房之籌略。不墜家聲。方誓山河。遽捐館舍。逝川無捨。遠日有時。徽績空存。書旗常而播美。音容不見。聽鞀鼓而增思。永念忠勤。彌深軫悼。往陳遺奠。庶鑒悲懷。嗚呼尙饗。

與希朝詔

勅希朝劉忠謹。至省所奏沙陁突厥共一千八百七十人并駝馬器械歸投事宜具悉。卿以將帥之才。鎮

華夷之要。憂勞爲國。忠勇忘家。聲動寇戎。塵清封略。突厥等嚮風輸款。率屬來賓。雖慕我懷柔。遠無不至。亦因卿威惠。導之使來。念其歸投。宜有優賜。今賜衣服及匹段等。自首領以下。卿宜等第給付。其部落家口等。遠經跋涉。宜稍安存。以勸歸心。用副注意。

與元衡詔

勅元衡。省所奏當管南界外生蠻東凌六部落大鬼主苴春等。以所管子第百姓等二千餘戶。請內屬黎州。并奏南路蕃界消息者。具悉。卿以文武之才。兼將相之任。仁和下布。黎庶獲安。威惠旁流。蠻夷率附。勤斯著。倚賴彌深。欽矚之懷。豈忘寤寐。生蠻部落。苴春等久阻聲教。遠此歸投。願屬黎州。請通縣道。勉於撫慰。以勸將來。所奏蕃界事宜。具已知悉。戎虜雖聞喪敗。封疆不可無虞。亦宜隄防。用副憂矚。

與陸庶詔

勅陸庶。省所奏當管新開福建陸路四百餘里者。具悉。卿望重周行。寄分越徼。嘉聞素著。茂政累彰。況勤可使人。智能創物。廢驚波之路。開砥石之途。捨舊謀新。以夷易險。財力不費。商旅斯通。惠既及人。動非擾下。績用可尚。欽歎良深。

答盧虔謝賜男從史德政碑文并移貫屬京兆表

卿男從史爲國重臣。自領大藩。厥有成績。公忠茂著。政理殊尤。勒石所以表勳。賜文所以褒德。惟功是念。有善必旌。是國舊章。非予私渥。昨又請移鄉貫。願隸京邑。家聲益振。臣節逾彰。雖清望標門。崇冠山東之族。而丹心戀闕。恥爲關外之人。載省懇誠。彌深嘉歎。所謝知。

與宗儒詔

勅宗儒。卿邦家楨幹。班列羽儀。嘗作股肱。弼諧無怠。及司管籥。鎮靜有方。欽重之懷。寢興不捨。春官之長。非賢不居。既簡朕心。亦符人望。今授卿禮部尚書。并賜官告。往除餘慶。東都留守。卿宜便與交割。卽赴上都。想宜知悉。

與希朝詔

勅希朝。省所奏。党項歸投。事具悉。卿邊隅寄重。閩外事繁。威行而軍聲外揚。信及而戎心內附。動皆展効。進必盡忠。勞績彌彰。倚望尤切。党項拓拔。忠敬等。頃雖爲盜。今已經恩。懼而歸投。情可容恕。許其後効。以補前非。卿宜安存。無使疑懼。其磨梅部落等。尙能繼至。亦許自新。宜加招諭。令知朕意。

與韓弘詔

勅韓弘。任光輔。至省所陳。請具悉。卿文武全略。邦家重臣。自居大藩。厥有成績。輯寧百姓。嚴整三軍。使予無憂。惟爾之力。省茲章奏。懇願朝宗。誠嘉深衷。難遂勸請。朕以梁宋之地。水陸要衝。運路咽喉。王室藩屏。人疲易散。非卿之惠不能安。師衆難和。非卿之威不能戢。今衆方悅附。人又知歸。鎮撫之間。事難暫輟。雖戀深雙闕。積十年而頗勞。然倚爲長城。捨一日而不可。勉卿忠力。布朕腹心。宜體所懷。卽斷來表。

答杜佑謝男師損除工部郎中表

卿道贊謨猷。功成輔弼。師損克承。訓義雅有。令名豈惟賞延。兼以能選。班行久次。頗積公勳。郎署稍遷。未爲渥澤。省茲章奏。深見懇誠。所謝知。

與嚴礪詔

勅嚴礪。省所奏進蒼角鷹六聯。具悉。卿任重列藩。寄兼外閫。事皆奉上。動必竭誠。時屬勁秋。致茲驚鳥。調習成性。進獻及時。取其効用之能。足表盡忠之節。

與韓弘詔

勅韓弘。卿苦心奉國。極慮撫人。惠彼一方。於茲十載。歷展勤王之効。累陳戀闕之誠。才以任彰。節因事著。不加殊寵。何表成功。夫外擁旌旄。爪牙之重任。內參台衮。股肱之寄深。以爾一心。授茲二柄。永言倚賴。當副誠懷。今除卿同中書門下平章事。依前宣武軍節度等使。餘並如故。并賜官告。往想宜知悉。

答王鐔陳讓淮南節度使表

卿自領大藩。累彰殊効。惠安百姓。表正一方。雖戀闕誠深。然殿邦寄切。既執圭而肆覲。宜返旆而勞旋。况淮海要衝。旌旄重任。永言共理。已有成功。方注意於撫綏。何瀝誠而陳讓。難允來請。宜體所懷。

答韓弘讓同平章事表

致理之道。審官爲先。以卿有文武之才。故授卿以將相之任。所冀外爲藩翰。張爪牙之威。內贊謨猷。宣股肱之力。僉諧允屬。衆望攸歸。方注意於安危。何執謙而陳讓。所進官告。今却賜卿。無或再辭。卽斷來表。

畫大羅天尊讚文

唐元和己丑歲四月十四日。畫大羅天尊一軀成。奉爲睿聖文武皇帝降誕之辰所造。惟歲之春。惟月之望。誕千年一聖之始。降百祥萬壽之初。電繞樞而夜明。雷出震而時泰。皇帝孝敬寅畏。憂勤勞謙。以爲無

疆之休。雖肇自於元聖。莫大之慶。思廣被於羣生。爰命國工。俾陳繪事。真相儼若。玄風穆如。疑從大羅。感聖而降。至誠上於通一德。景福旁濟於萬靈。休命耿光。自茲無極。詞臣承詔。恭爲讚曰。

大羅天兮高不測。

浩無倪兮杳無極。

中有聖兮無上尊。

惟玄德兮可升聞。

圖相好兮仰高真。

誠上感兮福下臻。

俾百祥兮其萬壽。

配聖日兮而長新。

答韓弘再讓平章事表

將相兼委。實難其人。非其德。不可謬承。當其才。不任懇讓。朕非虛授。卿勿固辭。宜斷來章。卽奉成命。已具前詔。當體朕懷。

畫元始天尊讚 并序

元者諸天之先。始者萬靈之母。混而成一。強以爲名。至哉無上尊。得以是爲號。正月二十有三日。德宗神武孝文皇帝上九仙之月。過八音之日也。皇帝教弘玄訓。業奉真宗。承文祖之貽謀。申孝孫之誠敬。以謂元始天尊者。真儀不遠。隨相而生。神用無方。應念而至。故命設繪。素展儀形。五彩彰施。七寶嚴飾。所以表當宁之瞻仰。感在天之聖神。通玄應於希夷。集靈祐於胖蠻。詞臣承命。跪唱讚云。

玄聖何在天上天。

欲往從之宵無緣。

命工設色五彩宣。

忽如真相現於前。

聖應聖兮玄又玄。

薦百福兮垂萬年。

北齊驃騎大將軍高敖曹讚 并序奉勅撰

高昂字敖曹。渤海蓆人也。姿體甚異。膽力過人。累經戰伐。皆著功績。官至驃騎大將軍。儀同三司。冀州刺

史其勇敢忠壯冠於一時。時稱爲名將。後竟以攻戰死於王事。年四十八。贈太尉。諡曰忠武。贊曰。敖曹之容。好配子羽。生揚勳烈。死謚忠武。武不顧身。忠不忘主。誠哉選士。無以貌取。

與驃國王雍羌書

勅驃國王雍羌。卿性弘毅勇。代濟貞良。訓撫師徒。鎮寧邦部。欽承王化。思奉朝章。得睦隣之善謀。秉事大之明義。又令愛子遠副闈庭。萬里納忠。一心稟命。誠信彌著。嘉想益深。今授卿檢校太常卿。并卿男舒難陀那及元佐摩訶思那等二人亦各授官。告往至宜。領之。此所以表卿勳勤。申朕恩禮。敬受新命。永爲外臣。勉弘今圖。以副遐矚。今有少信物。具如別錄。想宜知悉也。冬寒。卿比平安。官吏百姓等並存問之。遺書指不多及。

與季安詔

勅季安。劉清潭至。省所奏貝州宗城縣百姓劉弘爲母病割股充祭事宜。具悉。卿任重弼諧。寄深鎮守。勤撫綏之政。贊變理之功。至使部人忘身展孝。雖因心有感。誠化我之時風。而率下可知。足表卿之理行。省茲陳奏。欽歎良深。

答杜兼謝上河南少尹知府事表

三川封畿。實重其任。貳職綱紀。亦難其人。卿素懷器能。累著聲績。亞理以明。慎選專領。以展長才。知已下車。當親綏撫。佇聞報政。用副憂勤。所謝知。

代忠亮答吐蕃東道節度使論結都離等書奉勅撰

大唐四鎮北庭行軍涇原等州節度使檢校工部尚書兼御史大夫丹陽郡王朱忠亮致書大藩東道節度使論公都監軍使論公麾下專使辱問。悚慰良深。國家與吐蕃代爲舅甥。日修鄰好。雖曰兩國。有同一家。至於封疆。尤貴和叶。忽枉來問。稍乖素誠。雖有過言。敢以衷告。來書云。類見燒草。何使如然者。至如時警邊防。歲焚宿草。蓋是每年常事。何忽今日形言。况牛馬因風。猶出疆以相及。草木延火。縱近境而何傷。遽懷異端。未敢聞命。又云。去年忽生異見。近界築城者。且國雖通好。軍不撤警。近邊修緝。彼此尋常。况城是漢城。地非蕃地。豈乖通理。何致深疑。靜言思之。誰生異見。頃曾報牒。彼已息詞。今又再言。寧無慚德。又云。皇天無親。有德卽輔者。皇帝君臨萬方。迨及四載。道光日月。德動乾坤。南北東西。化無不及。若非皇天輔德。明神福仁。北虜何爲歸明。南蠻何爲慕化。風雨何因大順。歲時何因屢豐。則神助天親。可明驗矣。彼若無故生疑。無端結怨。但思小利。不務遠圖。則咎孽之生。恐不在此。永言取笑。却請三思。又云。漢之臣下。頻有叛逆者。近以吳蜀小寇。暫肆猖狂。未及討除。尋以殄滅。皇威不露。妖沴自清。豈假彼蕃。遠思傍助。忠亮謬蒙恩渥。叨在藩垣。恭守邊隅。幸鄰封壤。縱未能爲漢名將。亦不可謂秦無人。輒獻直言。以祛深惑。願推誠信。同保始終。各勉令圖。以求多福。歲暮嚴寒。惟所履安。勝遠垂惠。愧佩殊深。今因押衙迴。亦有少答信。具如別紙。恕輕勘也。不具。忠亮敬白。

與南詔清平官書

勅南詔清平官段諾突李附覽曇何棟尹輔首段谷普李昇傍鄭蠻利等。段史倚至。知異牟尋喪逝。朕以義重君臣。情深軫悼。卿等哀慕所切。當何可任。又知閣勸繼業撫人。輸誠奉教。蒸黎咸乂。封部獲安。皆是

卿等同竭忠謀。佐成休績。永言及此。嘉慰良深。勉終令圖。以副遐矚。今遣諫議大夫兼御史中丞段平仲持節冊命。閣勸想當悉之。卿等各有少信物。具如別錄。至宜領也。春寒。卿等各得平安好。遣書指不多及。

答王鏐賀賑恤江淮德音表

水旱流行。江淮艱食。朕明申詔旨。親遣使臣。獨其逋租。賑以公廩。爰與利物之利。用表愛人之憂。庶使疲氓均霑惠澤。卿克勤乃職。共理爲心。省茲賀陝。深見誠意。

與茂昭詔

勅茂昭。盧校至。省所陳奏具悉。卿翼戴君親。出入將相。久專戎闕。累覲王庭。忠勞必竭。其智謀誠懇。每形於章表。近者志在憂國。慮及安邊。請率精兵。親防黠虜。朕以卿當管軍鎮。寄重事殷。實藉撫綏。用安封部。雖未允所請。而深嘉乃誠。今又密奏恆州具申事體。曲盡忠勤之節。備知丹赤之心。言念再三。發於嗟歎。眷重之至。併在予懷。想宜知悉。

與藩孟陽詔

勅孟陽。卿夙懷才略。早振聲猷。歷踐班行。累彰績効。自守關輔。克舉藩條。軍及蒸黎。威行軍鎮。永言所任。未展其能。朕以東川蜀門重鎮。弊承軍後。雄歷險中。思得忠勤之臣。撫此凋殘之俗。量才注意。無以易卿。今授卿劍南東川節度觀察等使。并賜官告。往想宜知悉。

答宰相杜佑等賀德音表

古先聖王託於人上。與百姓同其欲。與天下共其憂。唯推是心。可底於道。朕臨御萬國。迨茲五年。惕厲之

懷雖勤於夙夜。愆伏之候。猶害於歲時。思革弊以救災。在濟人而損己。是用欽刑。緩死已責。卹貧罷郡。國之貢珍。省宮廩之煩費。延春令而布仁行惠。先南風而解慍阜財。庶憑歡心。以召和氣。卿等或匪躬獻替。或悉力弼諧。啓沃之間。已申霖雨之用。變理之際。佇見陰陽之和。各宜勉之。以輔予理。所賀知。

答宗正卿李詞等賀德音表

朕統承鴻緒。子育蒼生。累歲有秋。今春不雨。在陰陽之數。雖有盈虛。爲父子之心。敢忘惻隱。俾除人弊。以盪歲災。卿等任重宗卿。恩連屬籍。省茲陳賀。深見忠誠。

答將軍方元蕩等賀德音表

朕以時陽舛候。春澤愆期。思備旱之方。無如貶省。務動天之德。莫若精誠。是以修己卹人。去煩節用。冀答天戒。以致時和。卿志竭邦家。職修軍衛。省茲章表。深用嘉之。所賀知。

與迴鶻可汗書

皇帝敬問迴鶻可汗。夏熱。想比佳適。可汗有雄武之姿。英果之略。統制諸部。君長一方。纂承前修。繼守舊好。故得邑落蕃盛。士馬精強。連挫西戎。永藩中夏。况霽風之義。每覲於朝聘。事大之敬。常見於表章。動皆由衷。言必合禮。朕所以深嘉忠款。遐想風規。至於寢興。不忘歎矚。勉弘令德。用副誠懷。達覽將軍等。至省表。其馬數共六千五百匹。據所到印納馬都二萬匹。都計馬價絹五十萬匹。緣近歲已來。或有水旱。軍國之用。不免闕供。今數內且萬圓支二十五萬匹。分付達覽將軍。便令歸國。仍遣中使送至界首。雖都數未得盡足。然來使且免稽留。貴副所須。當悉此意。頃者所約馬數。蓋欲事可久長。何者。付絹少則彼意不充。

納馬多則此力致款。馬數漸廣。則欠價漸多。以斯商量。宜有定約。彼此爲便。理甚昭然。况與可汗禮在往來。義存終始。親隣既通於累代。恩好益厚於往時。所以萬里推誠。期於一言見信。思遠明智。固體朕心。其東都太原置寺。此令人勾當事緣功德。理合精嚴。又有彼國師僧。不必更勞人檢校。其見撚拓勿施。卽達於等。今並放歸。所令帝德將軍安慶雲供養師僧。請住外宅。又令骨都祿將軍充檢校功德使。其安立請隨般次放歸本國者。並依來奏。想宜知悉。今賜少物。具如別錄。內外宰相及判官摩尼師等。並各有賜物。至宜准數分付。內外宰相官吏師僧等。並存問之。遺書指不多及。

與韋丹詔

勅韋丹。竇從直至。省所陳賀。并奏江饒等四州旱損。其所欠供軍留州錢米等。並已放免。又奏權減俸及修造陂堰。并勸課種蒔粟麥等事宜。具悉。朕頃緣時旱。慮害農功。雖推咎己之心。敢望動天之德。而未逾浹日。膏澤霈然。仰荷玄休。俯增祇惕。卿喜深稱慶。忠切分憂。既覽賀陳。兼詳奏請。至如蠲逋以卹人隱。減俸以濟軍須。抑末業而移風。務茲菽麥。防旱年而款雨。修利陂塘。皆合其宜。並依所奏。非卿公勤奉上。仁惻發中。則共理之心。不能至此。再三興歎。一二難申。勉於始終。以副朕意。想宜知悉。

與從史詔

勅從史。史滌至。省所陳謝具悉。卿亡父早踐班榮。久著聲績。永言褒贈。自叶典常。况卿孝友承家。勤勞事國。念茲忠節。皆稟義方。將慰匪莪之心。宜流自葉之澤。豈爲殊渥。頻至謝章。

答宰相杜佑等賀德音表

朕以春候發生。歲功資始。順陽和而布政。賑貧乏而勸農。載念罪人。因除弊事。隨其所利。施以爲恩。富庶之端。實漸於此。卿等義敦宗戚。誠竭君親。省茲賀陳。用增嘉歎。

與孫璿詔

勅孫璿。劉德惠至。省所進隴右地圖。兼進戰車陣圖車樣。及奏陳收復河湟事宜者。具悉。卿尹茲右輔。固乃西疆。創制戎車。繕修軍實。思收故地。誓立殊勳。載覽陣圖。兼詳所奏。誠得開邊之略。益加報國之心。斯謂盡忠。彌增注意。眷言所至。無忘於懷。

與李良僅詔

勅李良僅。卿久在軍門。習知邊事。居常恭恪。動必忠勤。眷乃才良。可分憂寄。今授卿延州刺史。兼安塞軍使。并賜官告。往延州。既兼軍鎮。且雜蕃戎。防遏撫綏。兩須得所。宜勉所任。用副朕懷。

答京兆府二十四縣耆壽謝賑貸表

朕勤求人隱。慎卹農功。念播植之時。必資首種。慮懸磬之日。多乏見糧。將便公私。宜從歛散。卿等名登庶老。業守先疇。各勉農人。以副朕意。所謝知。

卷四十一

初授拾遺獻書

五月八日。翰林學士將仕郎守左拾遺臣白居易頓首頓首。謹昧死奉書於旒扆之下。臣伏奉前月二十

八日恩制除授臣左拾遺。前充翰林學士者。臣與崔羣同狀陳謝。但言忝冒。未吐衷誠。今者再黷宸嚴。伏惟重賜詳覽。臣按六典。左右拾遺掌供奉諷諫。凡發令舉事。有不便於時。不合於道者。小則上封。大則庭諍。其選甚重。其秩甚卑。所以然者。抑有由也。大凡人之情。位高則惜其位。身貴則愛其身。惜位則儉合而不言。愛身則苟容而不諫。此必然之理也。故拾遺之置。所以卑其秩者。使位未足惜。身未足愛也。所以重其選者。使上不忍負恩。下不忍負心也。夫位未足惜。恩不忍負。然後能有闕必規。有違必諫。朝廷得失。無不察。天下利病。無不言。此國朝置拾遺之本意也。由是而言。豈小臣愚劣。闈儒所宜居之哉。况臣本鄉里。堅儒。府縣走吏。委心泥滓。絕望烟霄。豈意聖慈。擢居近職。每宴飫。無不先及。每慶賜。無不先霑。中廡之馬。代其勞。內廚之膳。給其食。朝慚夕惕。已逾半年。塵曠漸深。憂愧彌劇。未伸微効。又擢清班。臣所以授官已來。僅將十日。食不知味。寢不遑安。唯思粉身以答殊寵。但未獲粉身之所耳。今陛下肇建皇極。初受鴻名。夙夜憂勤。以求致理。每施一政。舉一事。無不合於道。便於時。故天下之心。顛顛然日有望於太平也。然今後萬一事。有不便於時者。陛下豈不欲聞之乎。萬一政。有不合於道者。陛下豈不欲革之乎。倘陛下言動之際。詔令之間。小有遺闕。稍關損益。臣必密陳所見。潛獻所聞。但在聖心裁斷而已。臣又職在中禁。不同外司。欲竭愚衷。合先陳露。伏希天鑒。深察赤誠。無任感恩欲報。懇款屏營之至。謹言。

論制科人狀

近日內外官除改及制科人等事宜

右臣伏見內外官近日除改。人心甚驚。遠近之情。不無憂懼。喧喧道路。異口同音。皆云制舉人牛僧孺等

三人以直言時事。恩獎登科。被落第人怨謗加誣。惑亂中外。謂爲誑妄。斥而逐之。故並出爲關外官。楊於陵以考策敢收直言者。故出爲廣府節度。韋貫之同所坐。故出爲果州刺史。裴垪以覆策又不退直言者。故免內職。除戶部侍郎。王涯同所坐。出爲虢州司馬。盧坦以數舉事爲人所惡。因其彈奏小誤。得以爲名。故黜爲左庶子。王播同之。亦停知雜。臣伏以裴垪。王涯。盧坦。韋貫之等。皆公忠正直。內外咸知。所宜授以要權。致之近地。故比來衆情私相謂曰。此數人者。皆人之望也。若數人進。則必君子之道長。若數人退。則必小人之道行。故卜時事之否臧。在數人之進退也。則數人者。自陛下嗣位已來。並蒙獎用。或任之耳目。或委以腹心。天下人情。日望致理。今忽一旦。悉疎棄之。或降於散班。或斥於遠郡。設令有過。猶可優容。况且無瑕。豈宜黜退。所以前月以來。上自朝廷。下至衢路。衆心洶洶。驚懼不安。直道者疚心。直言者杜口。不審陛下得知之否。凡此除改。傳者紛然。皆云裴垪等不能委曲順時。或以正直忤物。爲人之所媒孽。本非聖意罪之。不審陛下得聞之否。臣未知此說虛實。但獻所聞。所聞皆虛。陛下得不明辯之乎。所聞皆實。陛下得不深慮之乎。虛之與實。皆恐陛下要知。臣若不言。誰當言者。臣今言出身戮。亦所甘心。何者。臣之命至輕。朝廷之事至大。故也。臣又聞君聖則臣忠。上明則下直。故堯之聖也。天下已太平矣。尙求誹謗。以廣聰明。漢文之明也。海內已理矣。賈誼猶比之倒懸。可謂痛哭。二君皆容納之。所以得稱聖明也。今陛下明下詔令。徵求直言。反以爲罪。此臣所以未諭也。陛下視今日之理。何如堯與漢文之時乎。若以爲及之。則誹謗痛哭。尙含容而納之。况徵之直言。索之極諫乎。若以爲未及。則僧孺等之言固宜然也。陛下縱未能推而行之。又何忍罪而斥之乎。此臣所以爲陛下流涕而痛惜也。德宗皇帝初卽位年。亦徵天下直言極

諫之士。親自臨試。問以天旱。穆質對云。兩漢故事。三公當免。卜式著議。弘羊可烹。此皆指言當時在權位而有恩寵者。德宗深嘉之。自第四等拔爲第三等。自畿尉擢爲左補闕。書之國史。以示子孫。今僧孺等對策之中。切直指陳之言。亦未過於穆質。而遽斥之。臣恐非嗣祖宗承耿光之道也。書諸史策。後嗣何觀焉。陛下得不再三省之乎。臣昨在院。與裴垪。王涯等覆策之時。日奉宣令。臣等精意考覆。臣上不敢負恩。下不忍負心。唯秉至公。以爲取捨。雖有讎怨。不敢棄之。雖有親故。不敢避之。唯求直言。以副聖意。故皇甫湜雖是王涯外甥。以其言直合取。涯亦不敢以私嫌自避。當時有狀。具以陳奏。不意羣心嗷嗷。構成禍端。聖心以此察之。則或可悟矣。儻陛下察臣肝膽。知臣精誠。以臣此言可以聽採。則乞俯迴聖覽。特示寬恩。僧孺等准往例。與官。裴垪等依舊職。獎用。使內外人意歡然再安。若以臣此言。理非允當。以臣覆策。事涉乖宜。則臣等見在四人。亦宜各加黜責。豈可六人同事。唯罪兩人。雖聖造優容。且過朝夕。在臣懼惕。豈可苟安。敢不自陳。以待罪戾。臣今職爲學士。官是拾遺。日草詔書。月請諫紙。臣若默默。惜身不言。豈惟上辜聖恩。實亦下負人道。所以密緘手疏。潛吐血誠。苟合天心。雖死無恨。無任憂懼激切之至。

論于頔裴均狀

于頔裴均欲入朝事宜

右臣聞諸道路。皆云于頔裴均。累有進奉。並請入朝。伏聞聖恩。已似允許。臣側聽時議。內酌事情。爲陛下謀。恐非穩便。晝夜思慮。不敢不言。伏見貞元已來。天下節將握兵守土。少肯入朝。自陛下刑服三兇。威加四海。是得諸道節度使三二年來。朝廷追則追。替則替。奔走道路。懼承命之不暇。斯則聖德皇威。大被於

四方矣。夫謀宜可久。事貴得中。當難制之時。則貴欲令其朝覲。及可制之日。則不必使之盡來。何則。安衆心。收衆望。在調馭之得其宜也。臣伏見近日節度使。或替或追。稍似煩數。今又許于頔等入奏。或慮便留在朝。臣細思之。有三不可。何者。竊見外使入奏。不問賢愚。皆欲仰希聖恩。傍結權貴。上須進奉。下須人事。莫不減削軍府。割剝疲人。每一入朝。甚於兩稅。又聞于頔。裴均等數有進奉。若又許來。荆襄之人必重困於剝削矣。奪軍府疲人之不足。奉君上權貴之有餘。伏料聖心知之。深所不忍。此不可一也。臣又竊聞時議云。近日諸道節度使。或以進奉希旨。或以貨賄藩身。謂恩澤可圖。謂權位可取。以入覲爲請。以戀闕爲名。須來卽來。須住卽住。要重位則得重位。要大權卽得大權。進退周旋。無求不獲。天下節使盡萌此心。不審聖聰聞此議否。今于頔等以入覲爲請。若又許之。豈非須來卽來乎。旣來必以戀闕爲名。若又許之。豈非須住卽住乎。則重位自然合加。况必求之乎。大權不得不與。况必圖之乎。重位大權。人誰不愛。于頔旣得。則茂昭求之。臣聞茂昭又欲入朝。已謀行計。茂昭亦宰相也。亦國親也。若引于頔爲例。獨不可乎。若盡與之。則陛下重位大權。是以人情假人也。授之可乎。若獨與彼。不與此。則忿爭怨望之端。自此而作。今倖門已開矣。速杜之。又今于頔等開之。臣必恐聖心有時而悔矣。其不可二也。臣又竊見自古及今。君臣之際。權太重。則下不得所。勢太逼。則上不甚安。今于頔任兼將相。來則摠朝廷之權。家通國親。入則連戚里之勢。勢親。則疎者不敢諫。權重。則羣下不敢言。臣慮于頔未來之間。內外迎附之勢。其勢已赫赫炎炎矣。况其已來乎。臣恐于頔未到之間。內外合言者。已不敢言矣。况其已到乎。脫或至此。陛下有術以制馭之邪。若用術制之。不如不制之安也。若又無術。將如之何。且于頔身是大臣。子爲駙馬。性靈事迹。陛下素諳。

一朝到來。權兼內外。若繩以規制。則必失君臣之心。若縱其作爲。則必敗朝廷之度。進退思慮。恐貽聖憂。其不可三也。凡此三不可事實不細。伏乞聖覽。再三思之。今臣所言。皆君臣之密機。安危之大計。伏望祕藏此狀。不令左右得知。况臣以疏議親。以賤論貴。語無方便。動有悔尤。言出身危。非不知耳。但以職居近密。身被恩榮。苟有聞知。卽合陳露。儻言而得罪。亦臣所甘心。若默而負恩。則臣所不忍。伏希聖鑒。俯察愚誠。謹具奏聞。謹奏。

論和糴狀

今年和糴折糴利害事宜

右臣伏見有司以今年豐熟。請令畿內及諸處和糴。令收賤穀。以利農人。以臣所觀。有害無利。何者。凡曰和糴。則官出錢。人出穀。兩和商量。然後交易也。比來和糴事則不然。但令府縣散配戶人。促立程限。嚴加徵催。苟有稽遲。則被追捉。迫蹙鞭撻。甚於稅賦。號爲和糴。其實害人。儻依前而行。臣故曰有害無利也。今若有司出錢。開場自糴。比於時價。稍有優饒。利之誘人。人必情願。且本請和糴。只圖利人。人若有利。自然願來。利害之間。可以此辯。令若除前之弊。行此之便。是真得和糴利人之道也。二端取捨。伏惟聖旨裁之。必不得已。則不如折糴。折糴者。折青苗稅錢。使納斛斗。免令賤糶。別納見錢。在於農人。亦甚爲利。况度支比來所支和糴價錢。多是雜色匹段。百姓又須轉賣。然後將納稅錢。至於給付。不免侵偷。貨易不免折損。所失過本。其弊可知。今若量折稅錢。使納斛斗。旣無賤糶麥粟之費。又無轉賣匹段之勞。利歸於人。美歸於上。則折糴之便。豈不昭然。由是而論。則配戶不如開場。和糴不如折糴。亦甚明矣。臣久處村閭。曾爲和

糴之戶。親被迫蹙。實不堪命。臣近爲畿尉。曾領和糴之司。親自鞭撻。所不忍觀。臣頃者常欲疏此人。病聞於天聰。疎遠賤微。無由上達。今幸擢居禁職。列在諫官。苟有他聞。猶合陳獻。况備諮此事。深知此弊。臣若緘默。隱而不言。不唯上辜聖恩。實亦內負夙願。猶慮愚誠不至。聖鑒未迴。卽望試令左右可親信者一人。潛問鄉村百姓。和糴之與折糴。孰利而孰害乎。則知臣言不敢苟耳。或慮陛下以勅命已下。難於移改。以臣所見。事又不然。夫聖人之舉事也。唯務使人。唯求利物。若損益相半。則不必遷移。若利害相懸。則事須追改。不獨於此。其他亦然。伏望宸衷。審賜詳察。謹具奏聞。謹奏。

論太原事伏三件

嚴綬 輔光

右嚴綬。輔光太原事迹。其間不可遠近其知。臣前日對時。已子細面奏。今奉宣輔光已替。嚴綬續追。此皆聖鑒至明。左右不能惑聽。合於公議。斷自宸衷。內外人心。甚爲愜當。其嚴綬早須與替。不可更遲。緣與輔光久相交結。軍中補署職掌。比來盡由輔光。令見別除監軍。小人乍失依託。或恐嚴綬相黨。曲爲妄陳。軍情事宜之間。須過防慮。伏望聖恩。速令貞亮赴本道。便許嚴綬入朝。

貞亮

右貞亮元是舊人。曾任重職。陛下以太原事弊。使替輔光。然臣伏聞貞亮先充汴州監軍日。自置親兵數千。又任三川都監日。專殺李康兩節度使。事迹深爲不可。違性自用。所在專權。若貞亮處事依前。卽太原却受其弊。雖將追改。難以成功。其貞亮發赴本道之時。恐須以承前事切加約束。令其戒懼。此事至要。伏

惟聖心不忘。

范希朝

右希朝前在振武。威令大行。至今蕃戎望風畏伏。况又勤儉信實。所在士卒歸心。今若太原要人。無出希朝之右。伏恐聖意慮其有年。臣又訪聞希朝筋力猶堪驅使。但且令鎮撫。必愜軍情。待其一二年間。威制成立。然後擇能者。卽必易守成規。則雖老年。事須且用。其靈武比太原雖小。亦是要鎮。如納臣愚見。伏望便須擇人與希朝相代。謹具奏聞。謹奏。

奏請加德音中節目

緣今時旱請更減放江淮旱損州縣百姓今年租稅

右伏以聖心憂軫。重降德音。欲令實惠及人。無如減租放稅。昨正月中。所降德音。量放去年錢米。伏聞所放數內。已有納者。縱未納者。多是逃亡。假令不放。亦徵不得。况旱損州縣至多。所放錢米至少。百姓未經豐熟。又納今年稅租。疲羸中重此徵迫。人力困苦。莫甚於斯。却是今年伏望聖恩。更與宰臣及有司商量。江淮先旱損州作分數。更量放今年租稅。當疲困之際。降惻隱之恩。感動人情。無出於此。敢竭愚見。以副聖心。

請揀放後宮內人

右伏見大曆已來。四十餘載。宮中人數。積久漸多。伏慮驅使之餘。其數猶廣。上則屢給衣食。有供億糜費之煩。下則離隔親族。有幽閉怨曠之苦。事宜省費。物貴遂情。頃者已蒙聖恩。量有揀放。聞諸道路。所出不

多。臣伏見自太宗。玄宗已來。每遇災旱。多有棟放。書在國史。天下稱之。伏望聖慈。再加處分。則聖明之德。可動天心。感悅之情。必致和氣。光垂史冊。美繼祖宗。貞觀開元之風。復見於今日矣。非小臣愚懇。不能發此言。非陛下英明。不能行此事。如蒙允許。便請於德音中次第處分。謹具奏聞。伏待聖旨。謹奏。

論于頔所進歌舞人事宜狀

右臣三五日來。聞於時議云。前件所進者。並是于頔愛妾。被普寧公主闖欲選進。今于頔所進。事非獲已者。臣未知此說虛之與實。再三思之。皆爲不可。何則。于頔自入朝來。陛下待之。深得其所。存其大體。故厚加寵位。知其性惡。故不與威權。中外人情。以爲至當。在於于頔。亦自甘心。今因普寧奪其愛妾。衆人既有流議。于頔得以爲詞。臣恐此事。不益聖德。在臣愚見。豈敢不言。伏見陛下數月已來。分別邪正。所有制斷。所有處置。無不合於公論。無不愜於人情。唯此一事。實乖時體。關於損益。臣實惜之。今道路云云。皆有此說。是于頔自進。亦恐外人不知。去就之間。恐須却賜于頔。內足以辯明聖意。外足以止息浮詞。又令于頔有所感戴。臣所聞所見如此。伏恐陛下要知。輒敢密陳。庶裨萬一。謹具奏聞。謹奏。

論魏徵舊宅狀

李師道奏請出私財收贖徵舊宅事宜

右今日守謙宣令。撰與師道詔。所請收贖魏徵宅。還與其子孫。甚合朕心。允依來奏者。臣伏以魏徵是太宗朝宰相。盡忠輔佐。以致太平。在於子孫。合加優卹。今緣子孫窮賤。舊宅典賣與人。師道請出私財收贖。却還其後嗣。事關激勸。合出朝廷。師道何人。輒掠此美。依宣便許。臣恐非宜。况徵魏宅內舊堂。本是宮中。

小殿太宗特賜以表殊恩。既又與諸家不同。尤不宜使師道與贖。計其典賣。其價非多。伏望明勅有司。特以官錢收贖。使還後嗣。以勸忠臣。則事出皇恩。美歸聖德。臣苟有所見。不敢不陳。其與師道詔。未敢依宣。便撰伏待聖旨。謹具奏聞。謹奏。

論王鏐欲除官事宜狀

右臣竊聞王鏐見欲除平章事。未知何故。有此商量。臣伏以宰相者。人臣極位。天下具瞻。非有清望大功。不合輕授。王鏐既非清望。又無大功。若加此官。深爲不可。昨日裴均除平章事。內外之議。早已紛然。今王鏐若除。則如王鏐之輩。皆生異望之心矣。若盡與。則典章大壞。又未感恩。若不與。則厚薄有殊。或生怨望。侍門一啓。無可奈何。臣又聞王鏐在鎮日。不卹凋殘。唯務差稅。淮南百姓。日夜無慘。五年誅求。百計侵削。錢物既足。部領入朝。號爲羨餘。親自進奉。凡有耳者。無不知之。今若授同平章事。臣恐四方聞之。皆謂陛下得王鏐進奉。而與宰相也。臣又恐諸道節度使。今日已後。皆割剝生人。營求宰相。私相謂曰。誰不如王鏐邪。故臣以爲深不可也。其王鏐鎮歸與在朝。伏望並不除宰相。臣尙未知所聞信否。貴欲先事而言。或恐萬一已行。卽言之無及。伏惟聖鑒。俯察愚衷。謹具奏聞。謹奏。

論裴均進奉銀器狀

右臣伏聞向外傳說云。裴均前月二十六日。於銀臺進奉前件銀器。雖未審知虛實。然而物議喧然。既有所聞。不敢不奏。伏以陛下昨因時旱。念及疲人。特奉德音。停罷進奉。天意如感。雨澤應期。巷舞途歌。咸呼萬歲。伏自德音降後。天下願望。遵行。未經旬月之間。裴均便先進奉。若誠有此事。深損聖德。臣或慮有人

云。裴均所進銀器。發在德音之前。遂勸聖恩。不妨受納。以臣所見。事固不然。臣聞衆議。皆云裴均性本貪殘。動多邪巧。每假進奉。廣有誅求。料其深心。不願停罷。必恐即日修表。倍程進來。欲試朝廷。嘗其可否。何者。前月三日。降德音。准諸道進奏院報事例。不過四五日。卽裴均合知。至二十六日。進物方到。以此詳察。足見姦情。今若便容。果落邪計。況一處如此。則遠近皆知。臣恐諸道依前。從此不守法度。則是陛下明降制旨。又自棄之。何以制馭四方。何以取信天下。臣反覆思慮。深爲陛下惜之。伏准德音。節文除四節。及旨條外。有遠越進奉者。其物送納左藏庫。仍委御史臺具名聞奏。若此事果實。則御史臺必准制彈奏。諫官必諫。宰相必論。天下知之。何裨聖政。以臣所見。伏望明宣。云裴均所進銀器。雖在德音之前。恐四方不知。宜送左藏庫收納。如此。則海內悅服。天下歡心。事出宸衷。美歸聖德。又免至御史諫官奏論之。然後有處置。在於事體。深以爲宜。伏願聖心。速賜裁斷。謹具奏聞。謹奏。

